

靈客遊記

編 號	_____
冊 數	_____
售 價	60.00

張

二百齋王海

游名山記

西南游日記一

丙子年
余久擬西南游遷延二載老至不能待遂以崇禎九年九月十九日為
萬里遐征計束裝未就適杜若叔至飲至于夜乘醉放舟天未明抵錫
邑同行者為靜聞師

十月初二舟止餘杭登陸沿苕溪北岸行二十里渡馬橋為餘杭臨安
界其北可達徑山西十七里至石錦亭北西去於潛徽郡道也余從
臨安道於亭南西去二里抵臨安西出關過皇潭循山西南行共十六
里為下圩橋南可直踰新嶺間道二十里抵新城新嶺甚險無托宿



處乃從迂道逾橋溯溪西上二里宿全張之白玉菴僧意餘杭人也聞
余負游癖深夜篝燈瀹茗為談游日本事甚悉

初四西二里過一橋折而南六里上乾塢嶺甚坦東西各崇山峻嶺
獨此峽中夷南北流分入茗與浙其山迤東忽挿天而起曰五尖山循
其西麓西南十二里石梁跨澗曰趙安橋由橋北西溯澗沿三九山北
麓入後葉塢又西十三里為鉢盂橋水西自龍門龕出橋下龕有四仙
傳道嶺在橋西四里乃餘潛境從橋北轉東南里餘東即三九洞山峙
其西環塢一區皆石峰嶙峋黑逾點漆丹楓翠竹間如錯綺水穿壁而
下濯石為雪時凌寒絕而溜黑崖白峽處如着懸瀑二里度橋至洞

山東麓洞山者自龍門龕南迤邐東來其石稜銳紋疊東南山半開二
洞正瞰橋下余同靜聞西向躡山沿小澗而上石皆峽躡壑透清流漱
之淙有聲夾澗兩旁石片踔出田畦中竹樹穿石而出再上忽一大
石當澗立方重不作透漏態而細紋密縐智索鏤工竹林有菴曰靈隱
菴後危壁空起聳翠成疊屏南即明洞如軒斯啟外五柱穿列正如
四明分窓但四明石色劣下不能若此列柱連綫也中一柱上不至簷
垂一石欲下而下不及柱相對不接者不可尺柱旁一樹高撐至簷
端轍遜而反曲翠色拂岩而下再南即幽洞兩洞並啓為石壁所界壁
輕紅若桃花入幽洞口高懸內若浮橋之覆空其中空洞無底人呼

輒傳響不絕二十丈之後忽南北洞分水陸者拾級而北如登閣殿
入三十丈轉南又闢一小閣其水洞南入一轉即仙田成畦塍界分明
水滿其中初無涸溢從塍上曲折入約十二丈忽水散潺湲乃透入小
門見一溪南來至此破壑下墜宛轉無底又過一峽透小門旁無緣徑
短衣去襪溯水躡流又三十丈石俱倒垂若蓮花平沙隘門忽束忽敞
正如荆溪白鶴洞而白鶴潛伏山麓得水為易此洞高闢山巔兼水尤
奇再入則石洞既盡滙水一方又不知滙者何來墜者何出也出洞溯
南來之溪二里止太平橋祠中

初五南二里上馬嶺里許達其巔嶺以北屬新城水亦出新城嶺南則
屬於潛縣在其西北五十里水由應渚埠出分水縣下馬嶺南十里過
兌口橋岐分南北二達於潛可四十里南則應渚埠道也兌口之水北
源自於潛馬嶺之水東來合而南出路隨之八里過板橋下水自西
塢來與前水合溯水西走路可達於潛及昌化又南八里止於唐家拱
南去應渚埠上二里原無市肆担夫以應渚舟下桐廬必北曲經此遂
止溪畔久之得桐廬舟蓋應渚埠為於潛南界溪之南即肆分水於潛
之水北經玉澗橋昌化之水西自麻汶埠俱會於應渚而水勢始大碩
玉澗橋而上已不勝舟麻汶埠而上小舟直抵昌化於潛水固不敵昌
化也下舟東南行十里為分水縣在溪之西分水原止一水東南去

其西山陸行八十里通淳安。余初欲從陸為王奴遁去，乃就水道反向東南焉。

初八抵蘭溪，與靜聞為金華三洞遊。金華之山橫峙東西，陽臨郡城，浦江在北，西垂盡處為蘭溪。東則義烏也。婺水東南從永康，經郡之南門而西北抵蘭溪，與衢江合。余將陸發行，見溪中一舟溯流而東，遂附之。水流沙岬，中四山俱遠，丹楓疎密映疊，尤佳。仰瞻北山，兀突天表，若負宸立，頽背之東南行，問三洞何在，曰在北。始悟三洞不必至，若陸行便可中道入也。六十里抵金華西門外。

初九即循城西北行，高下崗隴十里，至羅店。主人具悉北山之半為鹿田寺，其東下者南峙為芙蓉峰，西下者南結三洞，之西即蘭溪界。余欲由三洞返蘭溪，恐東有別勝，遂望芙蓉峰而趨。自店東北五里得智若寺，在芙蓉峰西北，山南麓首刹也。今已凋落，殿中止餘一碑，乃宋陸務觀為智大師建殿撰字，即其手書。碑陰又鐫務觀與大師手牘數首，楷碑行牘，且有風致，恨無塌工，不能得一通為快。寺東菴曰芙蓉，有路可登芙蓉峰，見峰高不及北山半舍之，仍由寺西北登嶺，升陟五里得清隱菴。由北塢登揚家山，遶其西山夾中，北透而上，則北山絕頂上倚於後，前列楊家山中，開平塢，竹石充隙者，朱淮督山墅也。東北石壘，蹲伏平莽中，曰石浪，為黃初平叱石處。石上即鹿田寺闢鷄岩，在其

東二里過山橋東下一里兩峽峰夾澗峰石片排空作鷄冠怒起狀溪流莽奔躍其下頗勝聞岩東下數里為赤松宮乃郡城東門所入道芙蓉峰東坑也岩北即北上頂有棋盤石板榛莽而上約二里始到石前有平臺壹塊后聳中列室一楹有澗冷從山頂下溯流再躋則石硤成門水從門出門上更得平壑所稱西玉壺也聞其東尚有東玉壺皆山頭出水之壑西玉壺之水南下者歷棋盤石而潛溢三洞北下則從裡水源出蘭溪北東玉壺之南下者水由赤松宮出金華東下者出義烏北下者出浦江凡一郡分流此其脊矣玉壺一名盤泉分聳於上者稱三望尖文之曰金星峰摠所謂北山也反宿鹿田寺

初十拉寺僧束炬從朱墅後西行一里北登嶺約里許一石聳出峰頂由石畔循山而東可達玉壺踰峰而北即朝真洞開高峰之上西向穿然下臨深壑中居舍歷落即下雙龍洞外居人也蓋北山自玉壺西來中文至此而盡後復生一支西走蘭溪其層分而南者一環為龍洞塢再環為講堂塢三環為玲瓏岩塢而金華之界於是乎盡玲瓏岩之西又一環而為鈕坑再環為白坑三環為水源洞而崇峴巨壑亦於是乎盡後支層迭中文中文西盡頽然下墜初闢為朝真中墜為水壺最下及谷底為雙龍所謂三洞也洞門皆西向層累而下各去里許山勢蘄絕俯瞰仰眺各不相及而洞中水實層注朝真洞門軒豁內洞稍

窪而下秉炬深入左有一隙如夾室宛轉隨之夾窮有水滴漑不休而
隙底仍燥不知水從何去也出夾室直窮洞底則巨石高下仰眺愈穹
從石隙扳躋下墜復得巨夾忽有光一縷自天而下洞頂高盤千尺石
隙一規宛如半月出內洞其左復有兩洞下洞所入無幾上洞宛轉亦
如夾室右有懸空下窺想即內洞深墜處出洞仍從石峰頭南下折
而西北得水壺洞門仰如張吻先投杖垂炬而下滾滾不見其底乃扳
隙倚空入忽聞水鼓轟轟秉炬從之則洞之中央一瀑從空下墜冰花
玉屑從黑暗處耀成潔采水穴石中莫稔所去乃依炬四窮其深陷逾
朝真而屈曲少遜出洞直下里許則為雙龍洞關西門一南向一西

向俱為外洞軒曠宏爽如穹屢高舉闔闔四啟非復曲房夾室觀流下
自洞後穿內門西出徑外洞去俯水所出處低覆僅一尺五寸余借一
浴盆於洞口潘姥家解衣赤身伏盆中推盆而進隘五六丈穹然高
廣一石板平架洞中離地數尺大數十丈薄僅寸左則石乳下垂綺窓
翠模橫列洞中溯水再進水竇愈伏無容入矣循溪南出羅店逾嶺歷
塢北入東轉去雙龍約五里又上山半里為講堂洞亦有二門一西北
向一西南向軒爽高潔可居可憩其澗涸不而流渡澗西逾第二嶺塢
逼嶺下而澗中有水淙淙北來又渡而西循嶺北上外隘中轉是名玲
瓏岩去講堂西又六里矣轉而西逾其嶺為蘭溪界下嶺為鈕坑又逾

一嶺曰思山祠去玲瓏岩西又六里時日已將墮問洞源寺道曰十里或曰五里亟下嶺循澗南趨五里至白坑又西逾石塔嶺後高峰之北即洞源寺從此嶺穿逕而上僅里許而正道在山前下洞旁蓋此地亦有三洞下水源中紫雲上白上洞其地搃以水源名故一寺而或名水源或名上洞而寺與水源洞異地時昏黑不辨山路竟循大道下山徑路紛錯久不得寺遙望一燈隱隱急投之則水春也其人曰此地即水源由此北過洪橋循石嶺而上可三里即上洞寺依其言得至強寄宿十一不及晨殮與靜聞從寺後躡磴北上覓白雲洞逾嶺而北嶺凹忽下窪如盂磬投莽從之一洞呀然下墜深黑疑即白雲仰問樵者曰此

洞窻也白雲在北乃復上北行兩山夾中又環成一窪大且百丈深數十丈螺旋而下中無滴水倘置水其中即仙遊鯉湖矣然山頂四環無一隙瀉者僅見此又下從峽西轉則為白雲洞門北向門頂一石橫裂梁架於上入洞仰窺所稱鵲橋者非耶轉而左漸下漸黑有門窻然內似甚深外有石屏遙峙黑暗中以杖探地而入數十步洞倍寬廣第無燈炬四顧無所睹返步出抵窻門初入黑甚者至是歷之可見乃轉屏出洞逾嶺還飯而出寺循舊路西下二里至洪橋未渡從橋左居人後上紫雲洞門西向中垂柱西五界為數重瓊牕翠帷處皆是亦敞亦奧膚色俱勝洞北一奧宛轉遂進亦以無炬返下渡洪橋循澗而東

渡石梁水源洞即在其側洞門南向正跨澗上洞口垂石續紛中一柱
自下屬上若擊之而起其上嵌空紛綸復闢一竇幻作海唇狀洞中上
下分二層下即澗水所出隘束之上層由洞門躡磴上入漸下則空
廣愈無極但聞水聲亦以無炬不及窮出生洞口擊柱內觀石態古幻
始與靜聞別洞源而去循西嶺出塢又西南十五里達蘭溪南閑飯而
登舟刺行五里泊橫山頭
十五始西入常山溪口過花椒山懸帆正拂赭崖自是兩岸綠橘丹楓
珍苞映日雖霜且嚴辰有同暄藻
十六午抵屬衢州府常山縣登岸募夫

十七五十餘里至東津橋其水自北山南流山高聳在玉山縣北三十
里外蓋自草坪北渡即西峙此曰三清山渡橋西五里由玉山東門入
而東津橋之水迤南而西至此已勝舟時已下午無長舟可附得小舫
至府二十里而暮榜人乘月鼓棹八十里泊廣信之南門郡西二十里
有石橋瀕流下流又有九股松一本木九分恭霄競秀俱不及覽

十八至鉛山河口初擬由廣信北游靈山且聞其地北山寺叢林甚盛
阻病創而止西南下三十里有峰圓亘曰仙來山舟過時卧未起及經
二十里潭至馬鞍山下迴望見之已不及登矣自仙來至雷打石凡二
十里石山介溪左右俱如伏牛覆釜不特形絕崆峒并無波縵文至織

土寸莖亦不能受或山斷沙迴霜痕樹色出村廬石隙中又二十里過
旁羅南望鵝峯峭削天際此余昔年假道分水關趨幔亭處又二十
里抵河口一水自東南分水關經鉛山縣至此入大溪兩溪合始勝大
舟

十九下貴溪舟二十里西至叫岩瀕溪石崖盤突下插深潭竇橫開其
上迴亘峰腰穿穴內徹如行廊閣道窓楞戶牖都辨崖上大書漁翁隱
次云崖石有磴可級余循級上列石縱橫穿石隙而達其後一徑成蹊
衆峰環亘壑迴峰易居人多截塢為池種魚鱗投問之地已屬興安
其前對之山圓亘而起曰團鷄石嶺之前即叫岩寺也叫岩前臨大溪

漁隱岬當岩左突出又一岬翼其右之崖之前一圓峰兀立溪中日印
山寺后岩石中虛兩旁迴突度以一軒為叫岩之為寺蔽景之佳曠在
漢隱不在此也西十里抵弋陽界有山方峙溪右若列屏而整上有梵
宇惜以棹急失之又三十里西南望龜岩孤峰插天際余心艷之又十
里至弋陽遂以行李托靜聞督舟去余與顧僕留旅舍為明日龜岩之
行二十雨中過西南門遇一龜岩人欲歸依之三里渡大溪俱從山崗行
淋漓十里望龜岩杳不可睹忽路左一峯疑即夜來插天際者詢之為
羊角嶠去龜峯尚五里比至遙望一峯中剖如門已而門之南忽歧出
片石如圭即天柱峰也及抵其處路復南去轉而東入先過一堰之南

滙水曰放生池。水兩浸崖足循池北。崖鑿石成棧。即展旗峰也。上危壁而下澄潭。盡竹色樹嵐。掩映一壑。兩崖飛瀑交注。既入。忽見南崖最高處。一竅通明。若耳之附顱。疑白雲所凝。最近而知為石隙。時雨勢彌甚。衣履沾濕。抵方丈。貫心上人。急解衣代。更焚火就爨。

二十一雨漸收。衆峰俱出。惟東南絕頂。尚有雲氣。貫心出。方丈中庭指點諸勝。正南而獨高者為寨頂。石如鸚鵡。名鸚鵡峰。又名老人峯。其北山之脊一起而為羅漢。再起為鸚鵡。三為淨瓶。為北下最高脊。四起最北為觀音峰。亦峭上。特出一圓頂。從下望之。如老僧南向。袈裟宛然。名為老人者。以此上振衣臺平視。則其峰漸分為二。由雙劍下窺。則頂

若一葉綴起。此為中支。北與展旗峰為對。楠木殿因之。從南頂而西。最削峭者為龜峰。三石攢立。峰頭與雙劍並峙。峰下裂隙分南北者為一線。天東西者為摩尼洞。其後即為四散谷。從其側一呼。則鼓傳宛轉。凡四。蓋以峰東水簾各石。崖迴環其上故也。峰東最高者即寨頂。西之最近者為含龜峰。其下即寨頂。含龜分脊處。而龜峰雙劍峭插於上。為含龜所掩。故其隙或顯或合。則并成一障。時亦陡露空明。昨遂疑為白雲耳。又西為雙劍峰。與龜峰並立。分脊之西南。龜峰三剖其下。而上併雙劍同本。而兩岐其頂。其南大書壁立萬仞。四字欵字剝落。相傳朱晦菴也。此二峰為西南過脊之中。東北與香合峰為對。而舊寺之南。因之

從西而北聯障於左者即含龜峰。下即振衣臺。平日石中懸屏。下乃道登摩尼一線天者也。次為明星峰。北接雙鰲。南聯含龜。在正東。峰為最高。又次為雙鰲峰。北下挿澄潭。即入谷所經放生池。南涯也。此三峰環峙。谷西南寨頂之脉。西北盡。此從南頂而東。最理環者為城梁峰。圍屏峰。此為東南層迭之後。西北與雙鰲為對。從東南北嶺。右列為轎頂。峰象牙峰。獅子峰。比肩各東。而寨頂之脉。東北轉於此。乃又從北而駢立。為案平列者。香爐。幻起者。靈芝。即方丈靜室所向。最高而歌張者。展旗峰。東昂。西下。南北壁立。南挿澄潭。即入谷之鑿棧於下者。此三峰排拱谷北。而寨頂之脉。東北盡於此。皆各之內者也。展旗北為天柱峰。

即昨遙望開岐如圭者。旁為太子峰。獅子南為卓筆峰。圍屏峰。南深壑中有其盤石。寨頂東南有朝帽峰。獨高孤立。寨頂後。余從弋陽東舟中遙見者。即此。近為諸峰所掩。又寨頂朝帽間。則有接引峰。寨頂西又有畫筆峰。蓋寨頂北下者。既為羅漢諸峰。其南迴西遠。列成屏障。反出龜峰之後者。此是也。岩上有泉。是名水簾洞。此則各之外者也。其各四面峰攢自成洞窟。惟西向一峽。兩崖壁立。水從中出路。亦逆之。其南龜峯之下。東從獅子峰之側。北從香合天柱間。皆踰峰躋隙。而後得渡。真霄壤中一靈勝哉。谷有觀音峰。一支自寨頂北墜。各分為兩。西則方丈靜室所托。最後為摩尼洞。振衣臺之路。東則榛莽深翳。余曳杖披棘而

入直抵圍屏城梁之下仰觀虎搏羊諸石使芟夷蕪蔓道置級益進
必有深美奈何任亂石茂棘阻絕奧區出循獅子峰北逾嶺南轉所謂
轆頂象牙諸峰從其外西向視之中懸一峰如卓筆不經此不見也衆
峰之麓俱石岡高亘其東又有石峰一支自寨頂環而西北與轆頂象
牙諸峰又環成一各余從石岡直南徹谷底復阻石棘而出因西逾象
牙獅子間脊歌削幾不容足迴瞰內各真別有天地矣此谷東第一外
谷也復循外嶺東行南轉二里是為棋盤石一大石穹立谷中平如砥
其西南即朝帽峰西北即寨頂蓋圍屏峰之後也其外峰一支自朝帽
峰下復環而北又成一各但其山叅差環立不復如內俱石崖削成者

此第二之東外各也寨頂朝帽之廣脊處一石高數十丈南向立即接
引峰也余於棋盤石頗見擬從此可躋絕頂開棘直窮嶺下則懸削無
階仍從故道至獅峰轉經香合峰登靈芝峰望天柱大子兩峰植立北
谷中蓋展旗峰獨峙於北又環成一各此北外各也從展旗西南直東上
其頂東南眺朝帽峰左又分立石一有同接引而接引則散不可見南
面龜峰雙劍俱成一壁迴環無復寸隙下峰從夾棧西出循放生池南
行出雙鰲明星含龜后東視三峰皆俱垂上可升捨之南東入即水簾
徑逾龜峰雙劍為下振衣各中道又捨而南有路東上知為登寨頂道
從之上二里西視龜峯雙劍已在足下始知已出水簾上下視各中三

面迴環如玦。惟北面正對龜峰雙劍。其西有隙可通。然掩映不見。所從此第一南外各也。循崖端最上已而舍北。從南見東南岡上亂石湧起。有若雙芝駢發。盤犬莖斂。下復並蒂中穿孔。其上飛舞變幻。賞不周接。又上一里。登一頂。復舍南。從北穿石隙而上。轉而東南行。其頂更穹然也。其東北復起一頂。西頂夾而成峽。東南自過脊始而西北溢於水簾山。遂中斷為兩。而通脊之度。其東南者一石如梁橫兩頂間。梁盡而轟崖削起。決無登理。踞脊上。迴瞰南。各崩墮直下。深不見底。但見東西對崖懸嵐倒翠。不知何途之入。此第二南外各也。久之覓路欲返。忽見峽北頂有級。下達自峽中直上者。因諦審峽南石上。復有級。同之始。知其道。

不從脊而從峽也。想寨為昔人盤踞。故梯險鑿空。今路為草沒而石蹟未泐。遂循級北下。峽底復自峽板級北上一里。東登最高處。竟與朝帽接引。連袂比肩。朝帽四面孤懸。必無可登。而接引之界於其中者。已立懸脊之上。兩旁俱矗石錯塊。不特下不能上。亦不可下。其北下之脊。即棋盤石南下之谷。當朝帽南來山脉所環而成者。亦不知入自何途。此為第三南外谷也。獨西無外各。乃絕頂之北。東分為圍屏城梁。西分為鸚口。然其異。下仰則穹然見竒。上瞰反宵絕難盡也。時日暮亟返。余已目勞懷竭。飛騰而下。不自知其足之前也。四里下山。東向入至雙劍。龜峯下有徑可入水簾。昏黑難辨。遂逾嶺息方丈。

二十二逾振衣臺上至龜峯下再穿一線天而東北過四散谷。壁一隙東南向內皆大石累度可北西出其西北為摩尼洞正下窺方丈平揖觀音諸峰遂下嶺西南循外各入水簾洞其處三面環崖迴亘自天北對龜劍二峯泉從崖東飄洒下墜為此中絕勝蓋龜峰巒嶂之奇雁宕所無但詘水觀耳北各獨飛珠捲雪在深各尤異但其洞雖與泉對而窪伏崖末為恨頽其危崖四合已可各洞不必以一窟標舉也時朔風舞泉游漾乘空散影俱異霽色忽開日采麗崖光水低徊不能去久之飯于寺而別仍從崖棧西出十里排前又西二十里至溜口暮涉其溪。西即貴溪境自排前至溜口迴望龜岩祇見朝帽峰作一羊角插

天與戈陽東向望不纖毫差別第此見一石人旁立亭。為異

二十三西行八里將至貴溪城忽見溪南一橋架兩山間執途人問之知為仙人橋隔溪不可至西趨二里入城覓靜聞於逆旅同出西南門經張真人墓碑乃趙松雪奉勅撰書者一里越一小橋東向溪。流直逼五面峰下此溪發源江湖山自花橋而下即通舟楫西北六十里至羅塘又二十里至此入溪為通閩間道其所北輸皆楮炭適有炭舟艤溪畔呼之渡。溪東一里由五面峰西北入其山俱石崖盤峙中剖而開並夾而起遠近離立不一抵穹岩下拾級而上得一臺綴兩崖如掌其南下級直垂澗底其西上則山巔余先扳磴里許至絕頂則南瞰西

華東瞰夾壁西瞰南溪北瞰城邑皆在指顧間以山雨忽來亟下山從前磴南下一線天即從峰頂中剖而下者是為直峽。至中間忽轉而東穿復得橫峽俱山下壁立東盡出塢而南望兩崖穹岩盤竇往。而是直抵西華余已逆五面峰稔視拾之仍轉出一線天北踰嶺二里東轉入小隱岩。上穹下遜裂成平竅東西環轉南連北豁可廬而憩。岩後有宋洪駒父宣和年間書余久知有徐仙岩遍問不可得聞有義眉山在小隱東南三里遂由羅塘大道過一嶺北轉入山竹樹深倩岩石高穹雨大至飯於岩中問仙橋道曰問道循山而東穿塢北去四里可至從之路甚荒忽久之逾一山忽見砬然高駕者甚近及下谷茫不得可

既直抵其下一石高跨峰凹上瑞如卷中闢成門面平整如臺余先至橋下仰視頂高穹不啻數十丈及登步其上修廣平直駕虹役鵲之巧不逮也從其西二里將抵象山問徐仙岩終不可得忽一老翁曰屋後南入即是舊稱徐岩今為朝真宮路荒沒非明晨不可覓余以明晨將發遂強靜聞南望山峽而入始猶有徑入漸滅兩崖深極不顧莽刺直窮其底石峽盡處隘不容足乃象山東第三塢望其西又有一塢入不得路問知路尚在西乃得入則高崖盤亘中有深岩外垂飛瀑乃象山東第二谷即徐仙岩也循暗路出南登象山兩崖前窅中塢不深而峻從崖石登仰止亭。高懸崖際嵌空環映仰危峰而俯幽壑令人徙倚

忘返守祠者以昏黑恐無舟渡遂扶余二里至中坊渡隔溪呼舟渡余
過乃別里餘入南關抵肆宿

二十四仍渡西南門太溪南十里新田鋪山勢漸開正值西華山之南
迴望諸岩兀突俱併成一山祇有高下無復割裂痕三十里過馬鞍山
復入山谷四里逾嶺下宿申命地為上清入山始境主人為余言南去
上清二十五里西去仙岩止二十里不若即此向仙岩而後上清便又
言仙岩之西十五里有馬祖岩不若竟赴馬祖轉而由仙岩抵龍虎以
盡上清為更便余善其計分靜聞待於上清而與頌僕西去

二十五趨而西二十里過香爐峰三危亘三臺南面直剖下中一凹佛

廬其上雨不及登其西即安仁界於是又涉饒郡池八里過新岩足不知
岩之在上也從東峽穿而北入有岩橫亘於西飛瀑交洒於上復探其
南三岩有戶掩竹間出躋其上高敞盤亘但無宛轉穿漏致此即新岩
非舊岩也西趨下山一里北轉入山峽三口巨石磊落高下盤峙深樹
古藤迷籠其上其內崖東西並峙北連南路三即峽口連者其底也馬
祖岩在東崖之半即新岩背余由岩下仰視欄柵憑虛以為殊勝及冒
雨登山石則穢息不可近蓋為業僧畜峙所且拒客不納強栖石龕側
二十六仍從北連處下轉上西崖直趨而南路斷處即來時峽口上也
崖壁俊立不可下瞰忽有洞透腹面出既越洞分兩道一道循崖而北

西崖並峽遂成一線一線中東崖下復裂而為岩清幽可托岩外之崖與對崖下墜百仞上挿千尺不合者盈庭而中亦橫裂邃若重接惟極北豁然以為可通外境而豁處天光上闢懸陰愈深削崖穹壁阻絕上下復還至洞門分道處仰其上層飛石平出然高不可扳從其南道轉峯側而上則飛閣危懸又闢一境覓路下不得仍穿洞出崖端覓路下峽口又不得乃循舊沿崖抵北連處下出峽口四里過南嶺遙望東面亂巖麗翠駢聳其北者為排衙石歌側其南者為仙岩最秀而近瞰嶺下一石尖挿平疇西南削起者為碣石下嶺即見大溪自東來直逼嶺足其溪發源瀘溪由上清而下乃從溪北溯流東南行四里至碣石下

仰望穹然雖漸展而濶然削立愈甚有孤柱分霄狀下有碣石村是為安人東南界渡溪南為瀝水山復隸貴溪矣又東五里直抵排衙石西為魚塘地東臨大溪下有脫

二十七蔡坊渡溪東一里龍虎觀後一里水簾洞南出山十七里曰石岡山金谿縣東界也入撫州境又八里宿孔坊

二十八五十里下一嶺為五里橋東南入金谿城南十里至大塘山二十九西南七十里抵建昌東門

十一月初二出建昌南城西二里至麻姑山足上二里半山亭又一里噴雪亭麻姑以水勝而詘於峰巒半山亭之上有水橫騫如卧龍蜿蜒

上至噴雪則懸瀑落峰間一若足練下垂一若玉筋分瀉分瀉者交營石隙珠絡縱橫亦不止於兩但遠眺則成兩瀑耳即墜仍一為合復如卧龍斜騫出峽去但上之懸墜止二百尺不能與崖窟匡廬爭勝再上五級連注可名五泄五泄各不相見各自爭奇其中兩潭甚深螺轉環連雪英四出此可一目而盡為少遜耳再半里上至龍門橋兩崖夾立泉搗中堅不敢下視架橋俯瞰於上又變容與為雄壯觀龍門而下上溪平山遶自成洞天不復知身在高山上也又半里為麻姑壇仙觀都觀左有大夫松已死右有通海井西上嶺十里逾篔簹竹嶺為丹霞洞又上一里王仙嶺最高西下左均中宿華嚴菴

天柱峯一帶

初三仍出篔簹竹嶺由西坳中南上越兩山東南共五里為飛爐峰南為軍峰北接麻姑東瞰盱江兩極芙蓉蓋在五老峰西揚華峰西北云初四東出建昌道太平橋南循溪五六里西折出從姑南上天柱峰山頂兩石並起如雙髻北向登其岩前曰飛鰲峰其後崖飛窾而出下有方池曰玉冷泉從東上天際亭之後鑿石梯而上一洞口隘如斗蛇伏乃入中高穹而寬天柱之南隅也仍下石級西沿崖登天柱鰲峰間有臺一掌上眺層崖下臨絕壁竹拂石門樹懸崖隙為雲臺岩漫其上西穿峰峽架木崖間曰雙玉樓再西一石欲墮未墮兩峽並起上下離立曰一線天此鰲峰北隅也一線既盡峽轉而北有平石二片方圓各異橫

度岐內曰跌跢石。此二峰者從天柱西。鰲峰北。又起二峰。高殺於鰲峰。天柱而以麗得奇者也。其東一峰。即南與鰲峰夾成一線。又與西峰夾度。跌跢者。西峰之西。又有片石橫架成臺。其東西俱可跌跢。云從跌跢石北。踐動石梯。東峯而上。其頂南架梁于一線。出鰲峰巔。東鑿級以躋。遂凌天柱之表。北瞰郡城。西瞻麻嶠。時天霽。明爽殊甚。從跌跢峽中。北下天柱之北。穹崖下。臨片石夾立。又柱北裂一隙。上有懸臺。可躡曰滴水岩。東下。又得穹崖一重。為竹影菴。從其南。板石而登。曰梅花岩。石隙東向。則天柱東隅下層也。飛鰲之西。有斗母閣。側一石曰蟾蜍。下嵌成窩。而上突為臺。則又鰲峰西隅下層也。

初五東南四十里為硝石。南溪東溪至此合。南來者為新城溪。舟抵新城。尚六十里。東溪四十里。至五福。又陸三十里。至杉關。為江閩分界。渡東溪橋而南。為鍊仙岩。山俱純石。北半斬削為崖。屏立田疇。間由崖隙而上。兩崖間。潄水成溪。崖挿溪底。鑿棧以入。又一水自東來。注亦純石。挿底隘。不容足。架梁南渡。入轉一橋。西渡大溪。遂躡山峽而上。則飛岩高穹。東西而出。僧憑岩結閣。種竹於外。頗幽敞。出渡峽橋。見有石級。西上。因躡之。盤旋山頂。西度過脊。皆深坑斷峽。迴亘縱橫。下山二里。仍宿硝石。東溪橋之南。

初六聞覺海寺。勝南趨二里。則南溪之左也。寺亦古。其前即鍊仙岩。以

西之第二重也。蓋硝石以來其山皆塊石堆簇南則交互盤錯斬若截
堵峰皆然以缺山為中西則兩突而峙於南溪之左東則兩突而至
於止。岩之東再東則山轉而南矣。入覺海見山在其前乃循崖以登
崖之西下瞰南溪涓。北流時有小舟自縣屬建昌府新城來既南行崖盡有峽東
下蓋南北兩崖對峙成峽其度脊處反在西瀕溪之上余見其峽深沉
遂躡山級東南直登其巔東西兩臺最高自西而東路盡莫前下瞰亂
壑縱橫峽形屈曲枝分匯水成潭分曹壑瀉疑即所云金龜湖也而二
峯東下無路但見東峽有水有徑疑即缺仙仍舊路下至溪東西崖對
峽處即從崖下東入峽中漸下漸濕遂東北三里至小港口水自韓公

橋而來渡之入山東北三里大石岩五里韓公橋三里雙回槽南二里
紫雲岩西一里渡溪為夫子岩返出紫雲一里至響石岩又登嶺一里
至竺岫

初七東南六十里與南溪遇東為觀音崖西為山居院西崖東溪門以
內澄潭甚深三里入新城北門出而西。南二十五里宿石瓶岡晚一
初九從草堂尤循崖南下路甚微削伏深草中直下三里東南一溪自
簫曲峰後與外層巨山夾而成峽巨山即閩界其東北度而為簫曲西
北度而為應感峰會仙峰兩腋溪流夾而西去簫曲南溪之上為板鋪
渡溪東南上嶺一里則平轉山腰又南二里直上山頂二里南下而東

上至應感岩。西向巨壑。直矗峭環。成一窩。置室於中。自下望之。直憑虛級壁也。從崖側躡登。里許至岩頂。以為諸峰莫高於此。既登而後。知會仙亭之更上也。應感二峰連起。東屬於大山。過脊甚峭。脊北之水出板鋪脊南。水即西出會仙峰北。自應感登會仙南。下三里過脊南水。復南上則會仙北。屬大山脊也。脊東之水西出會仙之南。其南又有大山。東北屬於應感後之大山。夾此水西去。其中塢落為九坊。乃新城五十一都地。對會仙之山名迷陽洞。山南即為邵武建寧縣。其大山東南為泰寧。其西南為建昌。之廣昌。自過脊至會仙。望之甚近。而連踰四峰。皆峭刻。四下四上。又四里而登會仙絕頂。則東界大山俱出其下。無論蕭曲應感矣。自會仙西至南豐。百里。東南抵建寧縣。亦百里。其界有側家斜。在迷陽洞南。為大山寥絕處。

初十由會仙西下十里。過溪即應感西南來溪也。又十里為下埔。應感溪自東而西。會仙南溪自南而北。俱會於下埔。北去自下埔而上。懸崖瀑布隨處而西。是亦俱會於下埔。西南十里至章村山。始大開有水。自南而北。源自建寧縣丘家嶺。去章村南十五里。又五十五里始抵建寧云章村。西南三十里宿梅源。

十一西五里至漆上塢。平疇一環。四山繞壑。以為平地矣。已而流忽下。墜循級愈下。遂成一瀑。名漆山灶。又五十里抵南豐。出其西。盱江自西

南遶城東北而北下西五里一溪自北來渡其橋軍峰溪自西來溯之
行數家列溪上曰三江口

十二渡軍峰溪從左路上路漸微六七里入山口越二嶺約三里詢知
正道在南從三江渡溪已悞也蓋其西嶺北為吳坑東南為坑東去三
江已十里乃南轉下一坑復得土人指上嶺共五里至後阿上三里一
小廟當道歧出廟西北平循山半陰崖行又二里至一山過脊處南北
俱有道西向登嶺道獨仄遂躡之登一峰即轉入山峽：有溪自西而
東：口破壁下縮口一峯西南半壁道傾至底石骨如削缺路在其對
崖循峽陰西入自過脊登嶺至此共二千七百步一石飛突南崖俯瞰

溪日溪光影俱為浮動溪中大石矗立西盡峽兩崖逼束成門水從門
中墜壁下濚迴大石而出蓋軍峰東溪源也飛突崖下架一橋渡澗而
北登嶺半里山迴水聚得歧路入龍塘菴西有龍潭路棘不可入菴左
渡小溪直上嶺六百步循崖而西復有飛澗從山巔墜下路橫越澗流
者五六次下復成一溪又九百步得橫木棧崖又二里直轉軍峰北仰
望峰頂猶天外一石澗自峰頂懸而下此北溪之源也渡溪二百步上
一嶺始與北來大路合自此西上一里至北嶺度脊處其西下為宜黃
道東即所來大道也自此南上鑿磴疊級次第間出蹈空而上道極修
廣愈上愈高風氣寒厲與會仙巽自分道處至絕頂悉直上無曲墜共

四千三百步抵軍峰巔下望五六尖峰自西南片來乃閩中來源也其南圓亘者為著棋峯亭之削刻非他峰所及蓋自南豐來從車盤嶺南面上不及北道之關然經著棋峰棧石轉崖度西峽中躡磴攀隙路甚奇險余從北道望見之恨不親歷

十三北下十里至嶺脊歧路處拾東北二里從西下里半得混元觀則軍峰北下觀也地已屬撫郡宜黃縣聞山南車盤來道亦有下觀雲云循山北下西山排列水瀉其中五里至澗底軍峰直北水也又一水自西南來乃軍峰西壑水至此會循水東北五里過袈裟石之維兩澗口聚落在其外曰墟上又魚牙山之水亦自西南來會與大溪合西轉下

宜黃墟上即東北岐溯一小溪十里至東源東上三里登板嶺之水西流入宜東南流入豐東北流亦入宜蓋軍峰北下脊也度嶺東竟塢一里水東出峽下墜深坑從北岐一徑五里至下村又北二里水入山谷中兩山隘東路灤山半曰十八排即七里坑也凡十里水破峽而出又一里山開水轉渡小橋而西曰楓林

十四即從小橋溯小溪北上五里入南灣坳逾分水嶺為南源即小溪源也五里至八角庄有水東下北二里登黃沙嶺下巾兒澗水亦東下北溯一小水三里上攔寨門平行李家嶺一里始下一里為磁龜又東北逾嶺下溪自東南下深坑路不能從東下三里山少開東逾一嶺

二里曰乘龍坳水亦南下復東上二里曰鷺要嶺平行二里下一里曰
鉏原先是下磁龜以為平地至此歷級東下共十里至歪排始知磁龜
獨在衆山上也歪排以上多險峻奔崖之流但為居民造楮濯水成潭
失飛練懸珠之勢然鉏原小水已如此不知磁龜以東諸東南注壑者
其奇勝更當何如也出歪排其南山塢始開水亦南下又東十三里則
盱江自南而北日方下午不得舟

京都二百堂

十五石江左山北行三十六里則從始在望入郡之南門

十八西循麻姑故道三十里逾朱君嶺復循山半行深竹密樹瀰山繪
谷紅葉朱英綴映沉綠中曰鞋山五里入石坪山環一谷隨水峽而入

復登嶺五里踏嶺頭即芙蓉峰東過脊也脊二重南下六七里有龍潭
古剎在深坑中道小不及下度脊而西即芙蓉山自南而北高亘衆山
上循山東北上里許山開一塢東北向是為芙蓉菴

十九從菴左小徑直躋一里出峰上又平行一里登三仙石為芙蓉最
高處東眺黃仙峰已不能比肩南眺軍峰直欲競峻芙蓉之南有陳峰
山在十里內高殺於芙蓉峭削似之凭眺逾時從峰北小徑西下里許
與石坪西來大道合下五里北轉始有高營叢木西上下四里登揭燭
尖西南下二里為南坑有澗自西南來四山環遶中平一壑隨水數轉
出里許一水自北至二水合而南出路因之西九里高峰逼而又合一

南來水與俱北遂渡港口橋循左麓而北五里抵上坪水注北去路曲西折上杉木嶺二十里宿車上

二十乘月西行即與大溪遇想即墟上之溪自南而北者發源軍峰經坑陰至此已而溪復西南下路折西北山中十里則大溪復自東南來渡之東行五里又一溪自西南循宜黃城東而北軍峰溪與之會再北又一小溪自城北來入三水合經獅子岩下遂北下臨川云乃與靜聞出宜黃北過豐樂橋上獅子岩迴盤兩層兀立三溪合流處又西北二里入山得仙岩高峙若列錦屏上穹下通其西垂忽透壁為門穿石而入則衆山內闕若另一世界是岩甚薄南面壁立北面穹覆其穿透

多隙正如處之通天岩之最奇者乃返出縣南循南來溪西南行二十里過玉泉山下山屏路右若負宸又南墜大溪二里一小溪自西來注即石砦下流也始捨大溪溯小溪南折入三里得石砦寺北有轟崖立溪上半白山巔平剖下南峰尤突兀與之對峙為門石砦巔正中懸其間寺倚巔東麓仰望之祇見峰頂立石轟然不知其中空也是晚宿寺中

二十一丞登砦是峯東西橫跨若飛梁瓦半較貴溪石橋軒大三倍從寺西眺抵得其端從寺北轉入峽中南向登仰見竹影浮颺一峯中穿高度雲末透石入南瞰亂峯兀突溪散山色另作光响非復人世出橋

南還眺飛梁之上石痕橫疊疑有級廬嵌室無路可登正徘徊間一山
鶴冲飛西去响傳疎竹間益令人留戀是橋之南其内石裂兩層自下
而上離合尺許由隙扳躋欲達其上層而隙夾逼仄轉身便碍無可緣
躡還問寺僧謂從橋内裂隙登必去衣履可及其上層而從上垂綆可
引入中層云下岩由小路五里抵玉泉山下山甚俊屏立溪西北上半
俱削壁僧疊級鑿峯崖架廬峰側一峰懸上二面憑空後復下隔深
峽離大山之石崖丈許登眺久之返抵北門逆旅已昏黑

二十二西北三十里至陳坊北渡小木橋沿小溪入五里由迴龍洞入
山隘抵曹山寺環峰四圍平疇一園水流其間亦此中一洞天也

二十三西南十里至朱碧街去樂安尚三十里

二十四西南四十里至太平墅東轉入華蓋山在山崇仁境二里為一天門又躡級

上一里為舊一天門有二小溪合於石屋上之從此行峻坂中七里至
二天門兩度脊東北遶三峰之陰共七里而登華蓋頂謁三仙焉華蓋
三峰並列而中峰稍遜西為着棋東為華蓋路由西峰而登其陽甚削
故取道於北華蓋之上諸道房簇遶仙殿無餘地可舒眺登着棋縱目
四覽其北正與相山對西南則中華山與頡頏東與南各翼以崇嶂然
皆不能與華蓋抗也是山在崇仁南百二十里東去宜黃亦百二十里
西去樂安正三十里西南一百至永豐東南至寧都則二百里焉余自

建昌宜取道磁龜則直西而至自宜黃則取道石砦從雲封寺亦直西而至今由朱碧則迂北而環而西轉東向入山取道雖迂五十里而得北游曹山洞石可無憾矣仍下三天門西南十二里出大陂溪中亂石平鋪水碎飛其上望齊冰玉

二十五為長至日早寒殊甚西南十五里溪邊一橫石臨流與靜聞箕踞其上不知溪流之即在其下及起回顧溪流洄透石出始知為架壑石也余道樂安聞城西十里有天生橋欣然欲往今路已南不及西向得此石雖溪石庠細已見天生石梁一班南十五里抵流坑又西八里宿於烏江溪南之茶園

二十六候舟逆旅渡溪橋北上會仙峰其峰在大溪北黃漠溪之西蓋兩溪交會是山獨峙其下流與雪華山東西夾黃漠溪入大溪之口者高聳突兀倍於雪華南面石骨嶙峋於此中獨為峻拔其西南則豁然溪流放注永豐境由溪北從東小徑西上五里至會仙峰更西北上一里石尤巒岼上多鷓花紅艷但不甚高亦冬深殊景也下山舟尚不行復止宿余自常山來所經縣治無不通舟惟金谿樂安通舟之流俱在四五十里外

二十七舟發烏江經永豐出水吉恩江

十二月初二抵吉安郡

初十登中華山上下俱十里

十一游洞雪

十二循中華而南十里登分水嶺逾嶺東五里為帶源由帶源隨水東行出水口峽水東去路捨水南入山六里過羅源橋復與帶水遇蓋其水出峽東行循山南轉至此度橋而北山始大開又五里宿水北十五由水北五里渡瀘溪橋為夏朗滯張氏西園數日

十八由夏朗西之華山之東小徑北五里西轉循西華北十里至富源西二里為瀧頭溪至此折而南入山又五里為瀟瀧溪東兩山間衝崖破峽兩崖石骨壁立有突出溪中者為瑞石飛霞峽中八景之一西北

十三里北宿於羅家埠

十九行十里循西岩山南又西十里踰孟堂坳則贛江南來為龍洋入處曰張家渡附小舟順流北下十里至永和其北涯有道可徑往青原登山隨山東北行五里入兩山間又一里有溪轉峽而出渡溪南轉石山當戶清澗抱壑青原寺西向而峙初入時不過東西兩山夾也至此塢轉入而南始覺水石清迥岩壑濛迥及登塔院下瞰寺基更覺中洋開整四山湊合其塢內外兩重外建書院內峙香阜若天造地設者是寺久為書院僧本寂竭力興復改院為寺鄒南臯郭青螺欲兩存之本寂力持不可始遷書院於外塢寂為余言如此寺前一溪由寺東南深

望中來至前滙翠屏下翠屏為水所蝕山骨嶙峋層疊聳出老樹懸綴其上下映清流景色萬狀寺左循流上山夾甚峻而塢曲、折入十里抵黃鮎嶺入口迴鎖極隘但知有寺不知寺後有此深塢也余自翠屏下循流扳澗宛轉其澗莫測所極覺水春菜圃種、俱有異致日漸西乃登山由五笑亭返寺出山渡溪橋從山南五里越而西、北十五里渡贛江暮烟橫渚不辨江城燈火又三里宿郡北白鷺洲

二十五入永新舟

二十六十里至神岡山下乃西入小江又西二十五里曰三江口安福江自西北來而西南來者永新江也舟湖西南行至是始有灘又十五

里泊橫江渡去吉安郡五十里

二十七二十里廖仙岩至是始有山南岸為泰和界北居廬陵境也自此舟轉北行十里永陽廬陵大市也在江之北然江之南岸猶十里而始屬泰和以舟曲而北耳又三十里泊止陽渡

二十八二十里至敖城始南轉揚帆五里上黃壩灘復北折入兩山間五里枕頭石轉而西三里上黃牛灘十八灘從此始灘之上為分綠潭、水深碧崖如門至北始有夾峙之崖激湍之石又七十里經畫灘角抵坪上則廬陵永新交壤處

二十九二十五里至還古望溪南大山橫亘下有二小峰拔地起問舟

人大曰義山無竒小曰梅田有洞在山麓余夙慕梅田之勝亟登涯令
奴隨舟候於永新余同靜聞由還古南行五里至梅田山下峰皆叢石
聳臺無纖土蒙翳其間真亭之出水蓮也東向者五洞北向者一洞惟
東北一角山石完善東南洞盡處與西北諸面俱為燼灰者缺削火淬
大喪玲瓏之質東向第一洞在穹崖下一突石障洞側洞門穹然高可
十數丈入洞後頂忽盤空起四圍俱削壁下垂如懸帛萬丈牽綯迴幄
上復嵌空成閣中仰一竅直徹山頂恨無十丈梯凌空置身其間也由
此北入左右俱有旋室透門伏獸垂幢不可杖舉而正洞垂門五重第
三重有柱中擎界門為兩正門在西偏直透洞光東偏則旁門暗中由

別隙入至第四門而合再進抵第五門約已半里而洞門穹直光猶遙
矚至此路忽轉西向入一門黑暗漫無所睹但聞傳响鏗錡比明虛
更弘遠欲出索炬燭之既返步所睹比入時更顯垂乳列柱種滿前矣
洞之南不十步又得一洞亦直北而入最後左轉亦昏黑其瑰異宏
麗少遜第一洞既出見洞之西壁一隙呀然側身入門高五六尺濶僅
尺半上下方正如從繩絜矩而檻桔成形宛然琢削其內石色與外洞
較異圓實側隙曲折玲瓏悉可蝸旋猿掛入有風蓬然出自內深空
中而昏黑無所見乃蛇退而出洞又南不十步再得第三洞則穹然
兩門一東向一南向中皆穹朗初直北入既而轉右轉處一石柱潔白

如削玉上垂為竇蓋緇園珠絡形多瑰異從此東折漸昏黑兩旁壁蓋
狹上甚高惜無炬不能燭其頂下則伏者漸低不容身而出自是而南
凌空之石俱厄於火斧烈焰乃從山下轉而北見聳削之勝四顧都無
徑路過東北折而西遇一人引入後洞：在山北甫入亦有一竅上透
山頂入其內高穹明敞當洞之中一石柱斜騫作槎枒狀曰石樹下有
石棋盤最內西轉云可通前洞而出時連游四洞日已下春既不及覓
炬再入而洞外石片嶙峋覺空中浮動益無暇俯挾幽闕遂與靜閣由
石瓣中踏隙上：至半下瞰諸懸石若削若綴度日已暮無覓炊處亟
下山：之西北隅慘受焚削與東南齊歎西過一間十里至大道西嶺

角西南行五里抵永新東關時余舟溯流逆上且迂曲甚繁尚未至縣
乃入游城中抵暮出舟適泊浮橋下也永新東二十里高山曰義山橫
亘而南為泰和龍泉界西四十里高山曰禾山為茶陵州界南嶺最高
者曰七溪嶺去城五十里乃通永寧龍泉道也永新之溪西自麻田來
麻田去城二十里一水自路江南向至一水自永新北向至合於麻田
三十出城南溯溪行七里小溪南自七溪嶺來入又西三里大溪西南
破壁去道自西北沿山入三里越草野嶺為楓樹復與大溪遇又西北
越合口嶺八里至黃楊山境始大開溯溪而西七里宿李田山鄉寒寂
徹夜不聞一爆竹聲北望岩嶠甚北問之即禾山也聞其地西去路江

二十里北面由禾山趨武功一百二十里計令靜聞先待於路江

正月初一余直北入山升陟五里越一小溪又五里北抵厚堂寺越小嶺始見平疇水田漠漠隨流東北行五里西北轉溯溪入山溪乃禾山東北流聚甚大余自永城西行未見有大水南入溪者當由東入永新下流也北高貴堂嶺西下復得平疇一塢曰十二都西湖溪入龍門坑溪水從兩山峽中破石崖下搗連泄三四潭最下一潭深碧如黛其上兩崖石俱飛突相向入其內復得平疇是為禾山寺南對禾山之五老峰背倚者乃禾山北支復起之山也蓋禾山乃寺西主山而五老其南起之峯最為聳拔兩山夾凹中有羅漢洞余武於武功不及為羅漢

五老游遂北登十里坳越嶺北下山復成塢曰鉄徑復從其北越一嶺下五里更得平疇曰嚴堂五里上鷄公坳一名雙頂嶺甚高嶺南之水出鉄徑北水則出陳山鷄公以北即安福境下嶺五里至陳山東西俱崇峻嶺夾峙上則虧蔽天日下則奔墜峭削深奧非復人境

初二北向行南來之水從東破山去又有北來水合而東路即溯流北上五里宛轉至嶺上東轉北度嶺脊曰常衝嶺西一峯為喬家山石勢嵯峨頂有若屏列若人立者諸山之中此為翹楚北下三里一石崖兀突溪左上皆純石橫豎水從峰根墜空而下者數十丈但路依右行崖畔叢茅蒙茸不能下窺徒聞搗空振谷聲下此始見山峽中田塍環

壑又二里抵盧子壠一溪自西南一溪自東南山峽與常衝之溪合而
北龍北一岡橫障溪使西走溪乃環岡復北遂西北流路始捨溪北過岡
又五里下至平疇山始大開成南北兩界而瀘子壠之溪復自西轉而
東遂成大溪東由洋溪與平田之溪合乃渡溪北行三里至妙山復入
山峽三里至泥坡嶺麓五里北越嶺而下又得平疇一壑曰十八都又
二里有大溪亦自西而東乃源從錢山洞北至此者平田橋跨之度橋
北上相公嶺從此迢遙直上五里有路從東來合又直上十里盤陟嶺
頭日炙如釜渴不得水久之聞路下淙淙聲覓莽間一竇出泉掬飲之
山凹得居落為門家坊之西一峯甚峻即相公嶺所望而登者正東北與
香爐峰對峙為武功南案

初三坊北三里轉而西復循山向北始東見大溪來自香爐峰麓是為
湘吉灣又下嶺連越兩山脊二里抵何家坊路從西塢下者乃錢山之
道路從北凹上者乃九龍之道而正道則溯大溪東從夾中行二里渡
溪循南崖一里三仙行宮在溪北從此漸陟崇崖二里直造香爐峰麓
其崖坳時有細流懸掛北下大溪去仰見峰頭雲影漸朗亟上躋忽零
雨飄揚三里至集雲岩雨遂沾衣乃入集雲觀少憩觀南倚香爐北向
武功前則大溪由東塢來西經湘吉灣而去雨少止倩一道流送至山
頂冒雨半里渡老水橋復循武功南麓行遂上牛心嶺五里過棋盤石

雨漸大道流還所畀送資棄行囊去蓋棋盤有道直北上五里經石柱
風洞又五里徑達山頂此集雲登山大道也。由小徑循深壑而東乃觀
音崖。道余欲兼而收之。直從山頂小徑趨九龍而所送道流欲仍下集
雲。從何家坊大道上。故不合而去。余遂從小徑冒雨東行。山支直從山
頂墮空而下。凸者為岡。凹者為峽。路循其腰。遇岡則躋而上。遇峽則俯
而下。由棋盤經第二峽。一石高十餘丈。豎峰側殊覺娉婷。其內峽突兀
叢樹望之甚異。而石滑草塞無可着足。循路東過峽者三。其岡下由澗
底橫度而南。直接香爐之東。水遂分東西流。西由集雲出平田。東即觀
音崖下江口。皆安福東北溪也。於是又過兩峽。北望峽內樹木蒙茸。石

崖竒詭。時見崖山白練如瀑。而怪無飛動之勢。審視之俱僵凍成冰也。
共五里抵觀音崖。一名白法菴。在武功東南隅。其地幽僻深奧。初為山
牛野獸窩。白雲鼎建禪廬。其徒隱之。擴大之。殿前廣池一方。亦高山所
難前。有尖鋒曰箕山。乃香爐東又起一尖也。菴前後竹樹甚盛。前大路
直下江口。後即登山東路也。雨止。由菴東躋。其後直上五里。抵山頂茅
菴。三石卷殿即在其上。而濃霧瀰漫咫尺不辨。道者引入叩禮。返宿茅
菴。武功山東西橫若列屏。正南為香爐峰。香爐西即門家坊尖峰。東即
箕峰。三峰俱峭削。而香爐高懸獨聳。並列武功南。若擣門然。其頂有路
四達。由正南者自風洞石柱下。至棋盤集雲。經相公嶺。出平田十八都。

為大道余所從入山者也。由東南者自觀音崖下至江口達安福。由東北者二里出雷打石又一里即為萍鄉界。下至山口達萍鄉。由西北者自九龍抵攸縣。由西南者自九龍下錢山抵茶陵州。為四境云。

初四露影忽開。忽合。從正道下覓風洞石柱直下者三里。遠見香爐峰時出沒。半山猶濃霧如故。遂乘未雨返山頂。先往九龍沿山脊西行。初猶瀰漫已漸開。三里下度一脊。忽沉霧中空。見中峰北矗。崖嶄柱直下。挿谷底。號曰千丈崖。百崖聳峙。迴環高下不一。隕北而下為門。為闕。為嶂。為樓。皆密樹平鋪。霧猶時。籠罩身。至其側。輒復開朗。標異蓋武功。屏立東西。與中共起三峰。而中峰最高。純石南面。僅見突兀。而北則極

懸崖迴嶠之奇。使不由此。而由正道。幾謂武功無奇勝矣。西三里過中峯之西。連度二脊。狹僅尺五。至是南北俱石崖。而北尤斬削。環穴多奇。脊上雙崖重剖如門。下隕至重壑。由此通道而下。可盡北崖諸勝。惜山高路絕。無能至者。又西復下而上。為西峯。與東峰無異。面石骨嶙嶒。則少遜中峰。又五里過野猪窪。西峰盡處。石崖特出。下容四五人。曰二仙洞。聞其上尚有金鷄洞。未入。於是山分兩支。路行其中。西下四里至九龍寺。當武功之西。垂崇山至此。忽開塢成園。中有平壑。水西出。峽橋墜崖而下。乃神廟。時與觀音崖東西並建。觀音開壑。下臨九龍。幽奧中敞。形勝固不若九龍。端密也。若以地勢論九龍。雖稍下於頂。其高反

在觀音崖之上出寺西越溪口橋溪從南下西越一嶺又過一小溪小溪合而南墜谷中溪墜於東路墜於西俱垂南直下五里為紫竹林僧寮倚危湍修竹間幽爽兼得亦精監之最精者從山上北望猶在重露中漸下漸開而破壁飛流倒峽懸湍十里而至盧臺或從溪左或從溪右循渡不一縱在轟雷倒雪中行但澗崖危聳竹樹翳密懸墜不能下窺及下而渡澗又復平流處矣出峽抵盧臺始有平疇一壑亂流交湧畦間行履沾濕夾溪四五家環堵離立遂托宿

初五東南越嶺行五里下至平疇是為大陂居民數家自成一壑一小溪自東北來乃何家坊之流也盧臺之溪自北來又有沙盤頭之溪自

西北來合而南出陳錢口兩山如門路亦隨之出口即十八都平田東向大洋也大陂之水自北而出陳錢上陂之水自西而至車江二水合而東經錢山下平田者也路由車上循西溪五里至上陂復入三渡溪南上門樓嶺五里越嶺復與溪會過平塢二里一峯當溪之中南北各有一溪滌峰前而合是為月溪上流路從峰之南溪入南有石蘭衝頗突兀又三里登祝高嶺平行二里東南下二里過洞北西南登一小山石色潤而形巉由石隙下窺一窟四環有門當隙中內為菴后為石城洞之外石崖四亘崖有隙東向菴即倚之菴北向洞在其左門東北向循級而下頗似陽羨張公洞門而大通之洞中高窄與張公並而深

廣倍之其中一岡橫間內外分兩重外重有巨石分列門口如臺當臺之中兩石竇聳立而起其左右列者北崖有石柱轟立大倍於竇而色甚古朴從石底高擎上屬洞頂旁有隙可環柱轉柱根湧起處有石環捧若植之盤中者其旁有支洞曲而北再進又有一大柱下若蓮花圖臺成柱上如寶幢敬子蓋屬頂傍亦有隙可循轉柱之左另環一竅支洞蓋穹因索炬不能遂止

初六由洞門南越一嶺可五里其處西為西雲山東為佛子嶺之西垂望見東面一山中剖如門意路且南向無由得一迫視又二里至樹林忽渡橋轉而東一里正取道斷山間乃即東向洋溪大道也蓋自祝高

嶺而南山分東西二界中開大洋直南抵湯渡其自斷山之東山又分南北二畧中開大洋東抵洋溪而武功南面與石門山之北彼此相對中又橫界祝高至兒坡一層遂分南北二大洋北洋西自上坡合陳錢口之水由錢山平田會於洋溪南洋西自斷山至路口水始東下合石門東麓盧子壠之水由塘前而會於洋溪二溪合流曰洋岔始勝舟而入安福初望斷山甚逼削及入之無奇也是名錯了坳入坳東南三里至午口南上嶺山峽片石森立色黑質秀如英石又二里一小峯特立而尖土人號曰天子地東逾一嶺五里為銅坑南直上黑霧中五里忽聞溪聲喧沸已循危崖峭壁上行霧中下瞰皆峭石駢立溪上沉黑

逼仄不能詳也已而竹影當前大敞出戶遂得石門寺問石門之奇尚在山頂五里而遙會雨大作因留寺

初七天雖霽露未晞日高乃上山迨下山日色已過午矣以不及至梁上遂由舊路下至銅坑北向十里宿路口劉氏宅

初八西南向石門西北麓行即向所入天子地處也五里小流自銅坑北麓西北注山峽間忽有亂石蜿蜒中一石橫卧澗上流淙淙透其下其石玲瓏若雲片偃卧但流微梁伏似園亭中物巧而不鉅耳又五里逾岡而得大澗一峰兀立澗北為洞仙岩踰澗南循西麓行其西即祝高南下之大洋也南為永新界又五里與大路合又五里一大間東自

牢芳坳來坳在禾山絕頂西北與石門南來之峯連列者渡之而南即為梁上復南五里連逾東來二澗過青塘墅又二里宿西塘

初九復南行西逾一北來之澗即前東來之澗轉而南者七里至湯渡始與大溪遇此溪發源祝高南合南下所經諸澗盤旋西山麓至此東轉始勝舟又五里至橋上其處有元陽觀元陽洞外列三門內可深入以不知竟去前溪復自北而南渡溪踰山十里隨大溪東入峽又二里為龍山數家倚溪上循溪東去崖石飛突如蹲獅跳虎高瞰其上路出其下灘石激湧殊為壯觀三里峽漸開出峽南北廓然又二里溪轉而南北望禾山高穹獨出與除夕李田所望無異始知牢芳嶺之東又

分一支起為禾山而禾山又西環一支至高石坳也禾山西南有溪南下至此與龍江大溪合而南去路亦隨之五里渡龍田溪循溪南岨東向行又六里至路江與靜聞會

初十由路江循西來小水二十里為橋頭分兩道直西向者往茶陵道也渡溪西南向則芳子樹下道於是從西南道十里至界頭嶺為江廣分界處蓋崇山南自崖子壠東峙為午家山東行者分永寧永新南北界北轉者至月嶺伏為塘石為茶陵永新界下嶺水即西流聞黃霄仙在其南遂迂道南入山十里南越一溪即黃霄下流也踰仙宮嶺下五里望南山高挿天際者即午家山乃永寧茶陵界也北與仙宮夾而成

塢中一峯自西而來至此始卓立下即黃霄廟之南有澗奔湧不見上流察之則一竅伏卓峰之下亂波流出遂成湍之勢游竟仍北出仙宮嶺十里與界頭之道合又一溪自西而東登源壑于壠在黃霄西北重山中渡溪北五里復得一溪亦東向去渡溪橋即為芳子樹下始見大溪自東南注西北小舟鱗次其下至高隴而更大芳子樹名昔有之今無矣

丁丑

西南游日記二

湖廣

十年正月十一日分靜聞舟從芳子樹順流至衡州期以衡之青草橋塔下予同碩僕從陸探茶陵攸縣之勝順流西行八里越兩崗至蟠龍庵庵前道分為兩一小溪北自龍頭山來過溪直西去是為巫江乃茶陵大道隨山順流轉南去是為小江口乃雲棲山道小江口即蟠龍巫江二溪北自龍頭至此南入黃雲大溪者雲棲山在茶陵東五十里沙江之上其山深峭神廟中孤舟大師開山建刹孤舟故虎來寺攬僧去遂僧徒星散豺虎晝遊人無入者每從人問津俱戒莫入且雨霧沉霾莫為引道予不為阻逆蟠龍小路南沿小溪二里復與大溪過渡溪南

入山雨沉。益甚西南三里則大溪復自北來直逼山下盤曲山峽兩旁石崖水嚙成磯沿大溪二里至沙江即雲嵒溪入大溪處道過一人持蓋將遠出見問雲嵒道即曰入此山非多人不可予為君前驅因隨抵其家為予覓三人各持械具火冒雨入初循溪口東入一里一小溪自西峽透隙出望其石崖層亘外束如門道者曰此虎窟也樵採從未有人者遂溯雲嵒大溪宛轉二里溪底石峙如平臺中剖一道水由石間下甚為麓觀於是上山轉山嘴而下得平疇一壑曰和尚園四面重峯環合平疇盡約一里復踰一小山循前溪上流曲折峽中一里抵雲嵒山深霧黑寂無一人而大雨催促遂同導者出溪口遇一舟附

之順流下時衣履沾濕得舟甚適買薪炊粥炙衣無暇遑問兩旁崖石也山溪迂曲下午登舟四十里暮舟子宵征三十餘里泊東江口十二聞靈岩在茶陵南十五里乃出城南渡鄱水東南行陂陀上下五里得平疇曰歐江有溪東南來湖之行霧中望東山石甚兀突心異之又五里抵沙陂溪原在東四十里百丈潭山最高者曰會仙塞下臨沙溪上亘圓頂如盂磨其內穹嵒裂洞曰學堂岩再東山峽盤亘中曰石梁在會仙塞東谷其谷亂嵒分亘攢列成塢兩轉而石梁東西橫列下開一竇由梁下北望別有天地透梁入梁上復開嵒一層由東陂上直造梁中止登之如踐重樓又東一里乃北入峽中一里得碧泉岩對

獅岩俱南向又東踰嶺下北轉則為靈岩。東向深數十丈高四丈自會仙岩至此山皆不甚高俱石崖盤互堆環成壑為瑛為門為岩為洞。往。而是但石質粗而色亦無通漏潤澤觀惟石梁橫跨下復窅然此中八景為第一。

十三返至茶陵南關外經大西門尋紫雲。陽諸勝西九里抵山麓曰沙江鋪大江至此直逼山下鋪西為攸縣安仁大道南登紫雲山上一里山半真武殿上則觀音庵俱北瞰來水予詢雲陽道菴僧曰雲陽山西去此十里頂為老君岩雲陽仙在其東峰腋去頂三里雲陽仙之麓為赤松檀去雲陽仙亦三里紫雲乃雲陽東北盡處而赤松為雲陽正

東麓由紫雲之北西順江岬三里為洪山廟乃登頂北道由紫雲南循山麓西四里即赤松壇則登頂東道也去頂各十里而近今觀音菴側西小徑二里可達羅漢洞菴亦有間道登頂不必下紫雲也予從之遂由真武殿側西北度兩小坳一澗從西北來則紫雲與羅漢后山夾成者水北入大江紫雲為所界斷渡澗即羅漢庵。東向予急於登頂從菴後西向登山濃霧翳山半不顧攀躋直上三里踰峰脊兩重霧漸開人上又二里則峰脊水塊盈柯大小依杖遇風輒墜時嵐霧悉消山之南與東二面歷。可睹鄱江自東南黃霄江自西北盤曲甚遠始知雲陽之峰俱自西南走東北排列數重紫雲其北面第一重也羅漢菴后

予所由躋者第二重也。雲陽仙第三重也。老君岩在其上為絕頂。所謂七十一峰第一峰也。頂峰在南。予所登峰在北。徑路迷絕。西南望峰頂中隔一塢。絕頂尚霾。沉霧中俯瞰。過脊處在峰足里許。其上隔山竹樹一壑。兩乳迴環掩映。疑即雲陽仙。雖無徑。亟直墜下。度脊上二里。踰一小坳。入雲陽仙菴。北向登頂道。由左畔上。可五里。至老君岩。菴后有巨石飛累。駕空竹樹懸綴。石間五雷池。澄碧迥異。層岩上突。無可扳陟。且黑霧密翳。其上辨晰甚難。蓋予所登道。當風無樹。故冰僅隨枝堆積。此菴中山環峰夾。竹樹蒙茸。紫霧成冰。玲瓏滿樹。每朔風一振。鏗然傾地。如玉山之顛。有積高二三尺者。途為之阻。通頂處登陟更難。因問赤

松壇。而僧楚者。訛為石洞。予貪石洞奇。遂捨登頂。東下山路。側澗流瀉。石間僧指為子房煉丹池。仙人指跡。諸勝予笑領之。直下三里。抵赤松壇。始知赤松非石洞。殿前特古松一株。無他勝。

十四濃霧四合。無復登頂望。循山麓北行。踰小澗二重。共四里。過紫雲麓。又六里。抵洪山廟。風雨暴至。市薪煨楮者。竟日廟後有大道。南登絕頂。時廟下泊舟數艘。俱苦石尤。不能順流。下屢招予。為明日行。予猶不能。恹然雲陽頂也。

十五泊舟。將放招予。速下舟。予見四山霧舒。雲泄。遂決策登山。由廟右南向。登三里一高峰。北峙道分兩歧。予初歧東南。疑由羅漢峽。向雲陽仙。

非徑造老君岩者乃復轉西南岐不一里陟高峰西峽頽僕南見峽頂若石梁東西架予瞻眺不及。西上嶺側大江已環其西大道乃西北下者遂望嶺頭南躋上嶺頭水葉紛披雖無徑著迹予意得石梁勝亦可以少慰升嶺遍覓無有飛駕石第見是嶺脊東南橫屬高頂其為登頂道無疑遂東南度脊仰首直上又一里再踰脊下瞰脊南雲陽仙已在履底蓋是脊東西橫亘西為絕頂北盡境東即屬前登雲陽東第二重嶺也於是始得道更南向上冰雪峰接行冰花玉樹中一里連過兩峰始陟最高頂從峰脊南下又一里復過兩峰有十字微路界峰坳南上復登山頂東西俱由山半下然脊北頂雖極高純土無石脊南峰較

下而東面石崖高穹峰竦林立乃從南嶺東攀崖踞石瞰塢中茅龕意即老君岩靜室因上已盡勝不必下時欲探秦人洞乃從西路行山陰冰棘縈阻舉足甚艱不二里道絕四顧皆茅茨僵凍舉首投足上下觸困蕪茅中時有偃宕疑為虎穴山下復重霧四沉瞰眺莫燭計難再下復望山巔上凍滑草附隨躋瞰墮念嶺峻草開可脫虎口益鼓勇直上二里復得頂北望前所西下脊又隔二峰矣又南一里再下二峰忽亂石排空片石攢刃交戟霧甚風急從中溜足直下強攀崖蹠坐益自豪既下石峰坳中復得十字路於是復西向下嶺二里草叢中時有細路又二里路微而石樹蒙翳又二里則石懸樹密路益絕蓋始路踰嶺而西皆

茶陵人自東來燒木為炭至此輒返過此崖窮樹深上者不能下者亦不復上遂與碩僕掛石投崖懸藤倒柯墜空者數層漸聞水聲終不識去人境遠近已霧影一閃路出層峰夾谷樹色深茂又見谷中兩重外平塢可矚乃益撥叢歷級既而下一懸崖忽得枯澗遂可踐石行而澗翳草中不辨水石為力甚艱三里下一瀑崖微見路影時隱現草間又一里澗從崖間破峽出兩峽轟峙北尤斗峭始得道從南崖踰嶺出又一里過北來大道一村居曰窰裡蓋雲陽西塢也其地東北轉洪山廟五里而遙南去秦人洞十五里遂南循山峽行踰一小嶺五里上棗核嶺俱雲陽西向度而北轉成峽者下一里渡澗乃南自龍頭嶺

下出上清洞依西麓溯澗南上半里為絡絲潭深碧無底兩崖多疊石又半里復渡澗依東麓登山是處東為雲陽之南峰西為大嶺大嶺高並雲陽龍頭嶺其過脊也其東南盡西嶺東北抵麻葉洞西北峙五鳳樓西南為古爽冲一溪自大嶺東北來者乃洪碧山之水一溪自龍頭嶺北者下乃大嶺雲陽過脊之水二水合北出把七龍頭嶺水南下者合秦人洞者水出大羅阜越龍頭二里得平疇曰東嶺塢內水田平衍却居稠聚東即雲陽西即大嶺北即龍頭嶺過脊南為東嶺迴環予始至以為平地及下東嶺而後知在衆山上也循塢東一里宿新庵十六南行一里登東嶺即從嶺上西行嶺頭多漩窩成潭如釜之仰釜

底俱有穴直下為井深或不見底是為九十九井是山下俱石骨崆峒
上透一竅輒水搗成井。雖枯皆無水然亦以九十九竅也。又西一里
則西南谷中四山環繞亦成仰釜。底有澗。東西皆秦人洞也。灌莽
中直下二里至其處澗由西洞出入東洞澗橫界釜中東西長半里中
流先搗入一穴旋透穴東出即自石峽中行峽南北俱石崖壁立夾成
橫槽水由槽中抵東洞南向搗入洞口洞有兩門北向水先分入小門
透峽下傾人不能從稍東南入大門者從衆石中漫流勢較平但洞內
水滙成潭深浸洞兩崖旁無餘隙可入循崖則路斷從水則苦無浮槎
惟小門水入峽后亦旁通大洞流可揭厲入其隙宛轉分徹如軒楞別

啟返矚搗入之勢甚竒西洞。門東穹較東高少殺水由洞後東向出
亦較淺可涉入洞五六丈上嵌圓頂四圍飛石架空兩重如度懸閣得
二丈梯可度上其下再入水亦成潭深並東洞不能入出西洞踰嶺二
里南抵塢下東洞水東向湧出山麓亦如黃雲之出石下也土人環石
為陂壅成巨潭以灌山塍水南流出谷路從其東北上嶺共三里仍達
東嶺塢

十七仍由新菴北下龍頭嶺共五里至絡絲潭下先是予按志有秦人
三洞上洞惟石門不可入予既得東西兩洞無從覓所謂上洞者土人
曰絡絲潭北有上清潭門甚隘水由中出人不能入。即有竒勝此洞

與麻葉洞俱神龍蟄處非惟難入亦不敢入也予聞之益喜甚既過
絡絲潭不渡澗即依西麓下蓋渡澗為東麓雲陽之西也棗核故道不
渡澗為西麓大嶺洪碧之東也出把七道北半里至上清潭洞即在路
之下澗之上門東向火如合掌水由洞出有三派自洞後者匯而不流
由洞左者乃洞南旁竇出甚急逾洞左急流即當伏水入導者止供炬
無肯為前驅者予解衣伏水蛇行以進石隙低而隘水沒大半必身伏
水中手擎炬平出水上乃得入西入二丈隙始高裂丈餘南北橫裂者
亦三丈然都無入處惟直西一竇闊一尺五寸高二尺水沒其中者如
所澗隙餘水面僅得尺之半計匍匐水中必口鼻俱濡水且以炬探之

貼隙頂入猶半為水漬時頽僕守衣洞外若涸水入誰為遞炬者身可
由水炬豈能由水耶况秦人洞水予雖沒浸股膝温然可近此水獨寒
而洞當風口颼尤厲風兼水逼火復阻道捨之出熱火洞門久之復
循西麓隨水北已在棗核嶺西矣去上清三里得麻葉洞在麻葉灣
西大嶺南洪碧東即雲陽棗核之支北則棗核西垂也大嶺東轉正東
澗下流夾峙如門當門一石峰聳突曰將軍嶺澗搗其西而棗核一支
西至此盡澗西有石崖南向東瞰澗中大嶺一支亦東至此盡迴崖之
下開一隙淺不能入崖前有小溪自西而東入大澗循小溪至崖西亂
石間水窮於下竅啟於上即麻葉洞口南向僅斗大在石隙中轉折

數級下初覓道亦俱以炬應無敢導者且曰此中有神龍奇鬼非符術不能服最後以重資覓一人將脫衣問予乃儒非法士驚出曰予以為大師故縱胆入豈能身狗汝耶予乃寄行李前却與顧僕各持數炬入村民隨至洞口者數十人皆莫能從予兩人乃以足先入歷級轉竇逋炬下數轉達洞底洞稍寬可側身舒首乃以炬前向其東西裂隙俱無入處直北一穴低僅尺濶等下甚平燥先以炬後蛇伏進背腹摩貼足後聳乃度此內洞第一關內裂隙既高東西橫亘然亦無入處又度第二關低隘與前齊規進法亦如之既入內層亦橫裂西南裂者不甚深其東北裂處上一石坳忽又縱裂起上穹下峽高不見頂至此石幻殊

形膚理頓易片竅俱欲生動其西北之峽漸入漸束內夾一縫不能容炬轉從東南峽仍下一坳其底砂石平鋪如澗底潔溜乾燥解水峽東南盡處亂石轟駕臺成樓臺由其隙皆可攀躋上其上石竇一縷直徹洞頂光由隙中射下宛如鈎月澗底南通覆石低獸高僅尺許此必前通洞外澗所從入者由層石下北循澗底入隘低甚與外二關相似稍從其西攀上一石隙北轉而東若度鞍歷嶠兩壁石色石質光瑩欲滴垂挂倒蓮紋同雕刻東下一級復值澗底已轉入隘關內於是闢成一街濶二丈高殺其五尺覆石平如布帷北馳坦底半里許下有一石度出為榻楞邊明辨上則蓮英下乘連接成幃四圍垂幔大與榻並中圓

透盤空上穹為頂其後西壁玉柱圓豎大小不一而色皆瑩素紋色刻鏤
街中第一竒也又直北半里洞分上下兩層澗底東北去上洞登自西
北時所齎火炬已去其七恐歸途迷惘遂割竒返抵透光處炬裁盡洞
外守視者又增數十人見余兩人皆額禮稱異且曰前久待不出疑墮
異吻予各謝之然此洞但入處多隘其中美勝予所見洞俱莫及不知
土人何畏入乃爾乃取行李於前邛隨澗北十里抵大道又西十里宿
黃石鋪去茶陵西已四十里鋪南即大嶺北峙峰石俱嶙峋挿空西南
一峰尤甚名五鳳樓去十里而近即安仁道予蚤臥不及詢明發登途
知己無及黃石西北三十里為高暑山又有小暑山俱在攸縣東疑即

司空山也二山之西高峰漸伏茶陵江北曲經高暑南麓而西攸水在
山北是山界茶攸兩江云

十八西北五十里抵攸縣

十九西南四十五里下太平寺嶺則大江在其下隔江即芒洲也候舟
不得宿泊舟門

二十上午始得舟順流西北向山峽行二十五里大鵞灘十五里過下
埠下四鄉灘險甚過此山始開江乃西向二十五里北下橫道灘又十
五里宿楊子坪民舍

二十一四鼓舟人乘月促下舟二十里雷家埠出湘江又東北十五里

抵衡山縣出望岳門三里越桐木嶺始有大松立路側又二里石陂橋
松始夾道五里過九龍泉又五里師姑橋山隴始開乃見祝融峰北峙
然夾路松至師姑橋盡五里入山復得松又五里路北有子抱母松又
五里過司馬橋入謁岳廟問水簾洞在山東北隅非登山道遂東出岳
市東北三里有小溪自岳東高峰來入小徑三里上山峽即望見水簾
布石崖下二里造其處乃瀑之瀉於崖間者非洞也下山又東北二里
登山循峽踰一隘中峰迴水流為九真洞亦山峽間瀑也在紫蓋峰下
踰山而北尚有洞亦山搗漸近湘潭境予見日將暮遂出山十里宿於
岳廟

二十二力疾登山由岳廟西度將軍橋岳廟東西皆澗北入山一里為
紫雲洞亦無洞山前一岡當戶環成耳由此上嶺一里大石後度一脊
里許路南有鉄佛寺後躋級一里路兩旁俱細竹蒙茸上嶺得丹霞
寺復從寺北側上由絡絲潭北下一嶺又循絡絲上流之澗一里為寶
善堂其處澗從東西兩壑來堂前有大石如劈西澗環石下出玉板橋
與東澗合而南寶善界兩澗中去岳廟已五里堂後復躡磴一里又循
西澗嶺東平行二里為半雲菴後渡澗西躡級直上二里上一峰為
茶菴又直上三里踰一峯得半山菴路甚峻由半山菴丹霞側北上竹
樹交映青翠滴衣竹中聞泉聲淙淙自半雲踰澗全不與水遇以為山

高無水至是聞之殊快時欲登頂過諸寺俱不入由丹霞上三里為湘南寺又二里南天門平行東向二里分路南一里飛來船講經臺轉至舊路又東下半里北度脊西北上三里抵上封寺東有虎跑泉西有卓錫泉凡住寺三日

二十六至觀音崖再上祝融會仙橋由不語崖西下八里路分南北二里九龍坪仍轉路口南一里茅坪東南由山半行四里渡亂澗至大坪分路東南上南天門道予乃從西南小路直上四里為老龍池在嶺坳嶺外多淨室西南至側刀之西雷祖之東二里上側刀峰平行頂上二里下山頂度脊甚狹行赤帝峰北一里迤其東乃南由坳中東行

一里轉出天柱東遂南下五里過獅子山與大路合由歧路西入福嚴寺

二十七由寺西循天柱南一里又西上二里越南分脊北轉循天柱西一里上西來脊遂由脊上西南行循華蓋東轉出其南麓西三里復循華蓋西北下風雨大至北過一小坪復上嶺共一里轉西行嶺脊上連度三脊或循嶺北或循嶺南共三里復上嶺直上二里是為觀音峰北樹中行三里雨始止沉霧益甚西南下一里得觀音菴又下一里為羅漢臺有路自北塢至者即南溝來道於是復南上三里度二脊既踰高頂南下一里得叢木一丘曰雲路堂又南下一里得東來大路遂西

下又一里半至澗度橋而西即方廣寺蓋大嶺之南石廩峰分支西下為蓮花諸峰北則雲霧頂分支西下為泉室天台諸峰夾而成塢寺居其中水口西去環鎖甚隘亦勝地也寺西有洗衲池補衣石在澗旁度水口橋即北上山三里得天台寺蓋泉室峰又西起高頂突為天台峰西垂一支環轉而南若大尾之掉幾東接其南下之支南面水僅成峽內環一塢如玦在高原之上與方廣可稱上下二奇仍返宿方廣二十八出補衲臺沿澗西行五里石樹澆溪岩影溪散上下交映又二里隔溪前山有峽自東南來與方廣水合流西去路遂北向登崖下石樹愈密澗在深壑中有黑白黃三龍潭西崖峭削路折而上聞鼗而

已不能見也已平行山半共三里過鷲公嘴得龍潭寺在天台兩峯下南為雙髻峰蓋天台雙髻夾而西來以成龍潭北即寺西為獅子峰尖削特立天台以西峰至此盡其南隔溪即雙髻峰而蓮花以西峰亦至此盡過九龍猶平行山半五里自獅子峰南遶其西下山又五里為馬跡橋而衡岳西面之山始盡橋東去龍潭十里西去湘鄉界四十里西北去白高三十里南至衡陽界孟公坳五里自馬跡橋南渡一澗即方廣九龍水去白高者東南行四里又越小橋一里上一低坳不為其為界頭也過坳又五里有水自東北山間懸崖下高數十仞曰小響水塘亦衡岳餘波也又二里有水自北山懸崖飛瀉是為大響

水塘濶大過前岬而水分兩級轉下峽間初見上級後見下級故覺其不及前岬飛流直下也前即寧水橋水南出沙河下衡郡草橋寧水橋五里過國清亭踰小嶺為穆家洞迴環圓整水自東南環東北乃石廩峰西南峽中水山環如水而東附於衡山之西經洞二里復南踰一嶺二里為陶朱下洞甚隘水直西出路又南入峽二里復踰嶺為陶朱中洞水亦西出又南二里上嶺坳甚隘為陶朱三洞敞於前二洞而不及穆洞之迴環二里又踰嶺為界江之西曰大海嶺溯水南行一里上一坳至旁塘即隨水東南行五里抵黑山又五里水口兩江逼湊水由其內破壁入一里水始出峽路亦夷又一里為橫口傍塘黑山之水南下岫嵯之水西南來至此合北望岫嵯白石諸峰甚近南去衡郡五十里

二十九沿溪南行踰大小犁坪共五里復與溪過循溪東南下十里越溪又五里入排衝排衝者山岡自黑山西之談碧嶺東南至青山分為两支俱西北轉兩岡排列夾為長塢至青山坳凡五里塢始窮乃踰坳而南入里下望日均至黃沙灣則蒸江自西南來路隨江東南下又五里抵衡郡之艸橋覓靜聞暮得之綠竹菴瑞光上人處菴在北門外華嚴松羅諸菴間八菴連絡俱幽靜明潔貝誦之聲相聞乃桂藩焚修地二月初一由菴東南踰小嶺至湘江溯江至蒸水入湘處渡江登東岬

東南行六里復西五里從丁家渡。江已在郡南門外登崖上回雁峰。不甚高東臨湘水北瞰郡城俱在足下。雁峰寺籠罩峰頂無餘隙。仍出北門登石鼓山。在臨蒸驛後湘江流其南蒸江北遶山由其間東突成峰前有禹碑亭後為崇業堂再上宣聖殿中峙為殿後高閣甚暢。曰大觀樓平視衡城與回雁南北相對蒸湘夾其左右近出突楞下近南萬家烟市三水帆檣遠極於岳雲嶺木亦為披映雖書院宏偉不及吉安白鷺乃地為名賢樂育之區兼滕王黃鶴諸勝非白鷺所得侔矣。樓後為七賢祠最后為生閣。東向下瞰蒸湘合流於前來水北入二里外與大觀東西易向大觀踞山頂收南北西三面之奇此則東盡

二江合流之勝者也。又東為合江亭址稍下臨流愈近下樓過青草橋東北二里入綠竹菴來雁塔者衡州下流第二重水口山也。石鼓從郡城東北特起垂江為第一重雁塔又峙於蒸水東來北水為第二重南瀕江與石鼓夾峙蒸水左右。初二至初六俱雨阻菴中。

初七靜聞同顧僕定永州船予循菴東入桂花園乃桂藩新構慶桂堂地前列丹桂三株皆聳幹參天接陰蔽日其北寶珠茶五株雖不及桂之高大亦鬱森殊匹。又東為桃花源西自華嚴天母二菴來南北俱高岡夾峙中層臺為池。兩傍依岡分塢皆梵宮紺宇諸藩闌亭榭錯出。

其間桃花源上即桃花冲乃嶺坳也其南最高處結亭曰停雲從亭北
逾桃花冲坳東復岡夾成池越池而上即來雁塔前為雙練塘西對
石鼓迤眺蒸湘交會亦甚深勝因促僧登塔歷五層四眺諸峰北惟衡
岳最高次西之雨母山又次則西北大海嶺餘皆崗龍高下無甚崢嶸
而東南二面豁然無際湘水自回雁北注城東至石鼓合蒸遂東轉經
塔下東合來水北去三水曲折不及長江一望無盡而紆迴殊足戀也
歸菴晤靜聞知舟行期二日後

初八入郡出南城一里由田厓麓一里入花藥山不甚高即回雁西
轉迴環下府城者諸峰如開翅舒翼西拱成塢有寺當其中若在城郭

內弘敞為一方冠

初九移行李舟中雨不止舟泊不行

初十僅行舟五里泊水府廟

十一二十五里南上鈎欄灘衡南首灘也又西二十五里為車江折而
東南二十里為新塘站又二里泊新塘上流之對涯二鼓中盜囊洗僅
脫身願僕被重創

十二賴靜聞於焚餘中拔得衣被數件體得蔽時劫舟已沉鍋具焚沒
無餘靜聞沒水取得一鐵鉋漉取江底濕米煮粥遍食諸難者余三人
因附土人舟返衡府抵鐵樓門已五鼓

十三入城投金祥甫欲假遊資於桂藩金其書記也日復一日竟不得要領

二十出步柴埠門外途遇折寶珠茶者花大瓣密其紅映日又見千葉緋桃含苞大如鐘皆桃花冲物也擬往觀之

二十二同靜聞出瞻岳門越草橋過綠竹園桃花歷亂紛目入桂花園則寶珠盛放花巨如盤殷紅密瓣萬朵浮圖翠之上真一大觀不復知身在窘難之中望隔溪塢內桃花竹色映帶生姿中有閣臨流亭新其巔循級入登山路亭為之憮然

二十六金闈會得百金遂貸二十金於予會桂藩復有所捐助靜聞不能無望予議先往道州留靜聞候助郡中待予還同西行

三月初三下舟風雨作舟子遷延晚始移泊南門埠

初四下午過汊江抵集雲潭去前日被盜處不遠

初五平明發舟風頗利十里過前日畏途沉舟猶在也四里過香爐山上有灘頗高又二十五里過桂陽河口桂陽河自南岬入湘春水出道州舂陵山歸水出寧遠凡疑山經桂陽西境合流至此入湘為常寧縣界由河口入抵桂陽尚三百里又四里至九州夾

初六二十里過白坊驛又西南三十里為常寧水口水從東岬入湘亦如桂陽河水較小常寧縣治猶在江之東南也西十里五泊糧船埠

初七西南十五里至河州驛。此地湘江東岸，為常寧界。西岸為永，是永州。永之初陽界，皆平陵。擴然崗阜，遠壘三十里。過大舖，西岸俱初陽屬。上九州灘，又三十里，至歸陽驛。

初八西七十里，五泊石堤裡。

初九五十餘里，下午抵初陽。予病不能登，昨予將至白水驛，力疾西望一橫山如列屏，至是舟溯流而西，又北轉，已出是山之陽。蓋初山也。山在湘江北縣，在湘江西初水南，相距十五里。上流則流自南來，循城東抵山南，轉初水西，自邵陽來，東入湘，遂並東曲去。

初十舟以候客未發，予念浯溪勝不可不登，乃沿江南五里渡之，東已入浯溪。下溪由東西入湘，流甚細。溪北三崖駢峙，西臨湘江，而中崖最高。顏魯公所書中興頌，高鑄崖壁，前有亭，下臨湘水。崖巔巉石簇立，如芙蓉叢。夢予病怯，臥崖邊石上，仰觀久之。舟至，又行二十里，過新婦塘。江北岸一石娉婷立崖端，矯首作西望狀。下有小鮮，日竹魚極腴。八九月重一二斤，他處所無。又十里泊舟滴水崖，在江南岸，危岩亘空。十一六十五里，抵七里灘。

十二三十里，過冷水灘。舟循東岸行，隔山聚落俱在石崖上。瀕江石骨嶙峋，直插水底。闌間之址以石，不以上。人從崖隙拾級以登。真山水中窟宅也。忽南風大作，薄暮風稍殺，舟乃行五里。已暮，乘月行五里，抵區

河

十三四里至湘口關湘江自西南瀟江自東南合於其前予舟由瀟入十里為永郡西門之浮橋已一舟從後來予移附其中蓋以明日向道州者下午舟過浮橋泊小西門隔江望西岬石甚森幻中一溪自西來注石梁跨其上心異之循城而北西越浮橋則浮橋西岸異石張吸執土人問愚溪橋即浮橋南畔溪上跨石者是鉅鈕潭則直西半里路旁嵌溪者是始知潭即愚溪上流潭從西橋從南也乃導通衢直西去路左人家隙中時見小溪流石間半里過柳子祠南向臨溪再西抵茶菴則溪自南來泥石東轉處石勢尤森特但亦溪灣一曲耳無所謂

潭也求小丘小石潭俱無能識者是水發源永州南百里之鴉山有冉染二名柳子易之以愚按文求小丘當即茶菴也菴去潭西數十步叢丘之上為此中鼎剝求西山亦無知者後讀芝山碑謂芝山即西山亦非也芝山遠在北當即柳子祠后圓峰高頂今為護珠庵者是聞庵間有柳子崖則為西山信矣予覓道其間西北登山崖已蕪竟不得道乃西南統茶菴前復東返柳子祠前渡溪南越一岡東轉出愚溪橋西端瀟江之上即前所望異石也因搜踏石窟上下穿眺尤幻橋內一庵曰圓通北向俯溪有竹木勝時舟在隔溪城下以舟子遲待予乃返十四晨過浮橋西見一長者叩以永州最勝曰湖江南二里瀕江為朝

陽岩北隨江轉入山岡亦二里為芝山岩無得而三也予乃先北趨芝山循江西岸半里至劉侍御山房由其側北入山越一嶺又北踰山岡登其山見山之西北湘水在北稍遠近則一小水從西來東南則瀟水在其東瀟江東岸又有塔臨江與此山夾瀟為永水口蓋此即西山北走之支北盡瀟江合流處當即柳子所記萬石山郡人則稱為芝山云越嶺北從嶺上東轉前望樹色合陰石崖轟奮知異境到矣即下崖脚仰望有菴倚之路遠其北而上乃捨菴上趨則崖石聳透固奇而兩旁亂石森立上下起伏如蓮萼芝房中處外簇隨地而是小徑由其間上至崖頂穿一石闕入有室南向遠其南西穿石隙入仍從西峽下至崖

脚一路竹木扶疎玉蘭鋪雪入崖下菴北一小閣可憩南結精廬倚之門在其左僧從內啟扉揖入小庭側竇穿卧隙而上崖石穹然一亭綴石末四窓空明花穉間發若置身盆石窈窕中出返至溪橋聞直西四十里有寺曰石門山最勝渴登朝陽岩不及往分令碩僕從橋東溯瀟放舟南上予從橋西仍過愚溪橋溯瀟西岸南行一里大道西南折道州道也由歧徑東南一里則一山怒而豎石奔與江闕踰其上東俯入石闕內飛石浮雲旁下瞰瀟水即朝陽岩矣岩後通前豁上覆重崖絕壑臨其下憩倚於中烟帆遠近當前供賞甫定而山谷傳響舟人已放舟於下促下舟予不顧崖北有石磴直下緣江亟從之磴西倚危崖

澄江東逼盡處忽有洞岬然高濶共四丈亦東面江溪流自中噴玉出水洞也洞口少入即南轉平整軒潔大江當其門內界流泉與上岩高下擅竒入五六丈即漚流滿洞西轉而黑計可揭進無炬乃出其北更有一岩覆結竒雲踵挿淵壘土人橫杙架板若閣道仍從石磴透出岩後凌絕頂佛廬挿其上舟人促不已乃下舟溯江漸東折七里至香爐山銳若髻石骨攢簇獨峙江西岸時見佳植綴搖下午過金牛灘上有金牛嶺北峰尖削南則橫窾三峰江流直搗其脇至是舟始南泊廟下舟行已五十里陸路止二十里也先是聞永州南二十五里有澹岩不意舟帆竟日岩猶在前也計明晨過其下舟人執不肯待予念陸近水遠不若聽舟去從陸躡之

十五里至岩北亟登涯期舟於雙牌雙者牌郡南五十里舖也郡南二十五里為岩北陸至此與江合陸即南入山又二十五里至雙牌水道則東迂溯江至雙牌又六十里計舟一日僅抵此予不難負病追躡也岩背東北臨江從其南二里西向入山岩俱怒湧作攫人狀已望見兩峰前窾西峰聳石尤異及登之官舍半額先是西峰之陽望見洞門高張至是路從其側出上見石崖攢舞環玦東向下則中空成岩容數十人下平上穹明奧幽爽無逼仄昏昧苦此洞底亦有垂石環轉覆楞分內外者巨石磊砢界道石上多宋元人題刻黃山谷最愛此丘謂為此

中第一岩東穿腋竅上有門上通叢石間東瞰官舍後迴谷岩西南又
闢一門踰門出其右石壁穹然僧寮倚之西眺山下平疇桑麻布壤中
有進賢江登源自龍洞去永城西南七十里江東來直逼山麓北入瀟
江側又有水洞去此二里秉炬可深入從僧寮循岩南東行過前所望
洞門高張處門雖峻中央不廣內亦不能上達後岩也仍冒雨東出臨
江過在數里外澹山南即崇山排亘支分東走故江道東曲避之
乃捨江南行七里至木排舖又南踰小嶺三里為陽江不能勝舟西
南自大小葉江來至此二十餘里東注瀟其北則西嶺橫亘南則曹祖
山張家冲諸峰駢立於前又南七里直抵張家冲東麓曰陳皮舖又南

三里踰嶺望西山層墜下時見石骨標異舉竒已復靈湊一區衆竅迸
幻亟西披之則片石層層盡若雞距龍爪下蹲於地又如絲瓜之囊筋
縷外貫而中悉透空但上下為蔓棘阻纏無從披躋隨之南見旁有隙
上新雉者輒為捫入然每至純石即復不雉問之路傍荷鋤者曰是乃
和尚嶺皆石山也其西大山曰七十二雷因指路隅一庵后更勝從之
則大道直出石壁下石忽屏棟起上多透明隙形備生躍清泉一泓下
穿雲根出有庵在其南問之僧則出水崖也仲見崖后石勢駢叢側有
路一線皆其雉地徑也賈勇從之其上石皆如卧龍翥鳳出水青蓮萼
叢瓣裂轉至出水崖後覺茹吐一區包裹叢沓而窈窕無竟蓋其處西

亘七十二雷大山叢嶺南列惟東北下臨官道又出水崖障其東北復
屏和尚嶺四面外同錯綺其中怪石層朋采艷奪眇予乃透數峽進東
北屏崖之巔有石高若若天門上開不可慰即若石西南即出水崖內
壑一潭澄石隙中三面削壁下嵌不見其底若爬梳沙蔓令石與水接武
武陵漁當為移棹予歷選山棲佳勝此為第一而九疑尤溪村口稍次
云搜剔久之始下由菴側南二里得大道一溪自西南山凹來過溪東
南一里復與瀟江遇溯江西南三里抵雙牌舟適至下舟西南豁然若
可遠達舟反向南山入瀧蓋瀟水南自青口合沅水即入山峽中是曰
瀧口北行七十里皆連山駢峽虧蔽天日且水傾瀉直中下所謂瀧也

中瀧有麻潭驛南四十里屬道北三十里屬零陵時風色甚利薄暮乘
風驅舟、灘捲浪如雷五里入瀧又五里泊橫口自永州至雙牌陸五
十里水倍之雙牌至道州水陸俱由瀧中行無他道故瀧中七十里止
有順逆分無水陸異出瀧至道州又陸徑水曲矣

十六二十里為麻潭驛已零陵盡界南即道州境自入瀧來山勢逼束
石灘懸亘山鵲盛開皆在水涯岸側不作蔓山布谷觀映碧流丹尤覺
有異二十里至吳壘鋪西南山削遜舟反東轉又五里復南又十里山
勢愈逼束為瀧口又五里泊將軍灘、有峯立瀧口若當閔然湖流出
瀧劃然另闢區宇是夜月明徹夕入春所未見

十七山開水曲五里至青口一水東自山峽出寧遠道也此水最大即瀟水一水平曠中南來者即道州道也此為沱水之小弱乃舍瀟南溯沱又五里為泥江口水西通營陽舟上羅坪三日程當即營水矣又三十里抵道州登南城迴眺州城南憑江水東南西三門俱瀕江惟北門在內地蓋沱水自江華掩遼二水自永明俱合於舟西南十五里外東北抵城西南隅遠南門至東門復東南去若粵弓而城臨其背

十八過城東半里有小橋即湧泉入江處泉流甚微橋側有石竄立江濱狀如永州愚溪橋透漏聳削過之分歧空腹隙可穿竇入所謂五如石也中一石擊之幽亮為響石按元次山道州詩題石有五如窠樽而

窠樽莫覓屢詢之云在報恩寺捨之出州西門南折過翼雲橋有二岐從西二十五里為濂溪祠又十里為月岩從南為十里舖又六十里為水明縣十里舖側有華岩之下間道可出濂溪祠予欲兼收之遂從南行大道兩旁分植喬松如南岳道中密過之有松自下分柯五六枝叢挺競秀此中特見他處所無也聞自州至永明松夾道者且七十里州西南皆岡陀高下道因之四顧崇山開遠惟西北一山最高較近則月岩後所倚大山也至十里舖東從小徑北半里為華岩洞門北向小水自洞下出由洞入止聞水聲東轉三文餘復南下則窈然深暗洞北有北僧察行急不及覓火炬聞其內一炬可盡遂從窠石北向小徑行此地

山俱小而峭或孤峙或兩或三石骨嶙峋草木搖颺其上曲折升降如在奔雲頽浪中而西北崇峰時從山隙瞻一面五里橫過山蹊四五重度一小石橋又踰嶺得西道從之二里又北入小徑共四里轉出平疇則道州西來大道也前一里抵濂溪祠北向環山下臨水前擴然容萬馬乃元公所生地濂溪則自祠西豸山麓北注乃西一里過豸山北渡濂溪自月岩來至此為豸山東障乃北走又東至州西入沱水泛溪北西溯五里抵達村西南入江路旁一峰甚圓銳出其南從此亂峰漸多為錐為指為列屏俱環映大山東牽引成蔓五里南轉入亂山腋又三里西越嶺望見正西一山白烟一抹橫其腰即月岩上層透空處也蓋高山西立若齊天不可階東下三級得此山中空上若下闢重門光徹前巒遙睇之如白雲浮動耳又二里抵月岩山下從東麓拾級上先入下岩東向中空上合高環成梁下望如於菟張吻日光牙血宛然栗畏復從岩上徧歷諸勝即月岩宿

十九仍過所望岩如白烟處分歧東南行穿小石山腋宛轉群隊中八里出山渡大溪東南十里至武田再東半里即永明大道橫過大道南一里半大溪湯介於前為永明掩邀二水渡江東南行六里得板道甚大南隨板道十里止板寮

二十東南從小徑一里出江華大道南為火燒舖在州南三十里而遠

又五里為營上則中江華道州設營兵以守者後有小尖峰倚之東數里外高峰突兀為楊柳塘屏且而南九疑當在其東矣南八里有溪自西而東石骨嶙峋橫卧澗中清流漱之不減包圍石壑南十二里至伽祐舖去江華十里由舖南直下一徑可通浪石寺東南轉從嶺上行共七里至江華城西出城南東南一里為麻拐岩又名回龍菴由菴沿江岸南行半里水分二道來一自東山谷中出者其水較大即沱水也一自南來者可通小舟登源自上武堡南即為廣西賀縣界大小二江合於麻拐岩之南大江東源錦田所溯流二百餘里舟行三四日可至小江南自上武堡舟溯流僅到白馬營可五十里然入江之口即種石為方堰置中流橫遏江舟不得上下堰內另置小舟外有橋橫板以渡白馬營東大山曰吳望山有秦洞甚奇惜未至又南始至上武堡東大山曰又冷山二山之水合出白馬營為小江上流云乃沿南來小江岸西行三里宿滾石寺

二十一欲往蓮花洞候引道者久之得一人由寺西遵大路行南去山盡即上武堡西踰大佛凹為富川道凹去江華西十里聞踰凹西二十里為崇栢即永明界又西二十五里過枇杷所在永明東南三十里為廣西富川界更西南三十里即富川縣治云遂七里直抵大佛嶺下先是路南一岩若雲楞嵌垂于意蓮花是在是而岩尚在路北大嶺麓乃從

歧小徑入不半里至洞下道者去枯竹一大捆縛為六大炬分肩以入
出復探路左洞披棘以進還飯浪石已過午乃循舊路抵麻拐岩西合
江口南渡小江堰外橋東南三里至重元觀寺南里許入獅子洞出返
麻拐岩北登嶺直北行已過東門外矣又北踰嶺渡沔水北宿江渡

二十二循東山東北行十里為蠟樹營由此漸循山東轉五里過鰲頭
北麓之十里過馬岡原自鰲頭至是皆循山北東向行山南悉徃人居
東十里逾虎版石為分村東渡西大溪共十里於是東登嶺先抵南面
崇山至是北亦有山橫列路遂東向兩山間升陟岡坳十里抵孟坳橋
西彭家村

二十三東一里南列山已盡轉而西列路循之南轉五里抵唐村坳其
東又有峰卓錫立戟亦自南趨北與西面之山若排闥直南遙望峰盡
處中豎一峰如當門之標望之神動惟恐道不出其下南七里東渡一
橋小溪甚急踰橋則大溪南日九疑北出青口即瀟水上流也北望小
溪入江口有衆舟艤其側渡大溪東南十二里直逼東界亂峯下南六
里至掩口營始與寧遠南來之道合北去寧遠三十里掩口之南東西
排岫橫障至此湊合成門向所當門之標已列為東岫首而西障東垂
亦豎一峰若挿屏若攢指若亘垣與東岫競鬪勝二里出湊門之下水
亦從中南出其下平疇擴然東西成壑路從西峰南轉西向行又三里

至路亭

二十四西五里為太平營由此西北入山多亂峰環岫蓋掩口東峰排列為劍戟此處諸岫如攢隊合圍中環成洞穿一隙入如方闢城垣山不甚高而窈窕迴合夾道皆宛轉之洞卓立之峰崆峒之石噴雪驚濤之初漲如是十里至聖殿聖殿者舜陵也予初從歧路望之見顏垣一二楹路復蕪沒竟從其東踰嶺北二里問耕夫已過聖殿抵斜岩矣遂西面登山則穹岩東向高張甚弘敞洞門石峰中峙門間界為兩飛泉傾布其上岩石垂石縱橫岩底有泉懸空下或從石端直注或依石竇斜噴衆隙亂流顧盼交射更一奇也下復開一岩深下亦極宏峻然

不能遠透岩之左上層復開一岩圓整高朗若樓閣乘虛正對洞門中峙峰兩瀑懸簾其前為外岩最麗處下有池潴水一方不見所出復無盈溢池北一門復開即左岩下層也由其內墜級下為深入道明宗上人曰此間勝迹君當先了書字飛龍二岩惟三分石遠不可到還以餘畧入洞為秉炬遊不妨深夜也予乃先探二岩隨明宗為導出斜岩稍北折而南下馬蹄石其陰峴石嵯峨疊雲聳翠益南過永福寺故址礎石猶偉已犁為田又南過一溪即瀟江上流西轉共三里入書字岩石不甚深后有垂石天矯岩外鐫玉琯岩三隸字宋人李挺祖筆岩石鐫九疑山三大字為宋嘉定六年知道州軍事莆田方信儒筆側又隸

刻漢蔡邕九疑山銘乃宋乃宋淳祐六年郡守潼川李襲之屬郡人李
挺祖書襲之既新其宮因鐫銘於側以存曩蹟後人固鄙孰若有巨書
遂以書字名岩及失玉瑄之實蓋此地為九疑中峰故鐫題於此予坐
玉瑄中因求道人往三分石者土人謂去此五十里俱徭窟中必且得
徭人為道然中無障樓攜大露宿乃可已而重購得一人乃平地徭劉
姓者期以晴爽乃往遂返過馬蹄石東入飛龍岩從山半階下內亦
寬廣如斜岩外層之南岩中有石坡中懸但無宛轉致返斜岩明宗出
七火炬與顧僕分携蕪炬前導始由岩左下層循隙歷磴下水自岩頂
飛注與人爭級盡路舒水亦無有東向入洞忽平廣既而石田鱗次

水滿其中從膝上行下遂墜成深壑石田上有石池由池涉水乃梅楊
洞道拾之仍下洞底涉一溪水自西而東流入洞內截流之後循洞石
行路復平曠洞愈宏濶有巨柱端豎中央直近洞頂東復有一小石侍
立其側又東為弔空石一柱自頂下垂空半止其端反卷而大又東有
天柱石蓮花珍是通爛泥河即前涉下流河底泥靡陷深及膝少遼緩
足沉不得拔乃行循洞左壁崖片楞垂上飛為蓋下度為臺中凹為
牀為龕南眺一方柱自洞底屏列上躋其東亦一柱與之並起更高巨
端有一石旁坐石蓮上為大士座由此西下可北遶大士座後前爛泥
河水亦遶大士座下西來至此南折去洞亦南轉愈極宏崇水深艱渡

游者至此例止予強明宗渡水。深逾膝然無爛泥河濘甚既渡南向
行水流於東路循其西四顧石柱參差高者十尺低亦丈以數十紀俱
光耀如凝脂日雪洞又前日風洞前又當南下渡河明宗謂曾無抵且
此者故前過大士座輒抽炬置挿路為誌若再入前逼深潭後迷歧竇
寧不為歸逾慟耶時予不借已為蕢洗一足行先令頽僕携一輪陷壞
者以渡河水深竟私置大士座下遂不能前返約所入已三里餘聞其
水潛出廣東蓮州恐一臆論大抵入瀟之流然所進周通正無底也還
過初渡第一河上石田北入楊梅洞先由石田涉石池。兩崖石峽如
門池水滿浸涉亦逾膝然其下石底坦齊旁無寸土入峽門大石種橫其

隘透隘入復得平洞寬夷豐博北皆飛石平鋪若樓閣有隙下窺則石
僅板薄下復穹然成洞水從下層奔注入即爛泥諸河上源也洞中產
彈丸圓石四面紋痕蝟毛起楊梅之名以此。洞所入水即岩外四山
窪注地中者此塢東為蕭韶峰西即斜岩南為聖殿西嶺北為北蹄石
皆廓高裡降有洞釜底四面水俱潛注第不見所入隙耳出洞已薄暮
卧岩中終夜暴雨宣散而不能辨詰朝視之則陰雨霏也

二十五靜息岩中寒甚間則觀瀑寒則煨枝以竟日此岩之瀑非若他
處懸崖下俱從覆石之底穿竇下注其懸於左岩上洞前者二瀑皆然
為最壯其右崖窪洞上者一瀑數竅較小左瀑乃出自懸石之端者一

出石底之竇歌噴者二

二十六雨仍不止下午往聖殿仍由來道此逾嶺稍東轉出瀟韶峰北
蕭韶自南而北屏峙斜岩前上分兩歧北盡為舜陵前環流數峰正
中者上歧為三稍西者頂有石獨聳陵有二大樹夾道大四人圍廟僧
呼為珠樹結實大如指去殼可食兩旁巨杉亦有大四人圍者尋丈以
上即分歧高聳乃冒雨返斜岩

二十七雨止急飯踰馬蹄石嶺抵玉瑄岩南覓所期劉猛以雲霧未
盡已他往同居一人于乎山中甚熟暗惜患創不能導為予言由此
東行五十里有三石參天水分三處俗呼舜公石即三分石也路已湮

由此南行三十里有孤崖如髻盤突山頂俗謂之舜母石有徑可達下
即為瀟江過嶺即為麻江麻江口舟可達錦田且以所摘新茗獻返過
永福故址之南溪流甚急雖西下瀟江而東南北三面皆予所經尚未
暗來處乃溯流尋之則故址之南石崖倒懸水由下出崖不及水者三
尺其下甚深不能及也是日仍觀瀑炙薪岩中雲氣漸開心目舒逸因
為永南諸洞殿最道州月岩第一九疑斜岩第二江華蓮花洞第三獅
岩第四永明朝陽岩第五澹岩第六江華大佛嶺側岩第七九疑玉瑄
岩第八通州華岩第九月岩南嶺水洞第十九疑飛龍岩第十一又聞
道州長田有中朗洞勝不及到

二十八仍過玉瑄南覓導猛為肩火炬前行東上楊子嶺二里上有石人立而起山皆盤突東南折行嶺坳中三里曰茅窩皆竒石下深窩有石崖嵌削千尺四面交流搗入岩洞是名九龜進岩西向南疑永福南透崖出者即此水也又東南二里越嶺為蟠龍洞水口又登嶺一里為清水潭其東下嶺韭菜原道也余東南二里渡牛頭江水東自紫金原來江兩岸路俱峭削上下扳援甚艱渡江即東南上半邊山其東北高山為紫金原山外即藍山縣境其西南高山為空寮原空寮原前山有白石痕一幅上自山巔下至山麓若懸帛再南為香爐山在玉瑄岩南三十里三分石西北二十里高亞三分石頂有澄潭廣三畝中

石筍兩枝亭三出水面三文餘疑志所稱天湖也由半邊山頂行五里屢度山脊下少上多共東南五里出鰲頭山先是沉霧不開半邊鰲頭諸山亦近望不及身至始出至是南眺三分石不知所在頃之雲忽澄明瞥然閃影高峰頂與江山縣江郎山相似一為浙源一為瀟源但江即高矗山半此懸萬峰絕頂為異耳半邊鰲頭兩山東北與紫金夾牛頭江西南與空寮香爐夾為瀟源江乃兩水中脊二水合於玉瑄東南西下魯觀與浦江合始勝如葉舟出大洋為沿鰲頭東嶺半行二里始下三里下至爛泥河始得水野炊已下午其爛泥河東五里踰嶺下三里為高粱原隸藍山西境嶺乃藍山寧遠分界處在三分石東余往三

分石下爛泥河即與高粱原分道折而西南行又上一嶺山花紅紫闌
色余於鰲頭山始見山鵲蘭花至是又有紫花二種一種大花如山茶
小者與山鵲等艷色可愛枯樹間蒸菌黃白厚大如盤余袖摘夜至三
分石穿箐烘之香正如香菌又山木千霄有獨木最貴楠次之又有壽
杉葉扁同側栢之儔也鉅者圍可五人高數十丈瀟源水畔渡河處倒
橫一楠修可齊眉長可三四十步凡上下嶺共五里抵瀟源水東南
從三分石來經香爐山東北出魯觀者乃絕流南渡即上三分石嶺麓
嶺峻削不容足細徑伏深箐中俯首穿箐上即兩手挽之以移足時箐
猶夙霧淋漓首不得舒又不得平行其下惟為垂空縞練資如是八里

路漸平又南行嶺上二里濃雲仍翳望頂莫辨而晚色漸合遂除箐依
松得掌大地山高無水有火不成炊命導猺砍大木積焚之箐箐圍火
為度宵計既暝吼風大作飛火星舞空中火焰流徙倏忽奔突數丈初
謂竒觀既而雨次盛風傘被浣濕幸火威猛烈足以敵之五鼓雨盛火
亦奪魄矣

二十九天明漸霽仰見三分石露影在咫尺間輒憑飢冲濕而南又下
山二里始知尚隔一峰也度坳中小脊復南上三里始有巨石盤崖昨
升降處皆峻土無塊石為導猺悞出其南一里東眺巖頂已可周摩
之為霧所埋對面無所睹道窮磴絕忽山雨大注頂踵莫不沾濡乃返

過巨石崖始見有線道俱伏箐中雨巨不可上遂返至夜采依火處擬
從直北舊路下就溪炊米又悞出其西竟失道以之得微礮炊澗中已
當午躑躅莽箐中下抵礮則五澗縱橫交會一處蓋皆三分石西南北
三面水也向所渡東來一溪尚在最北溯流東一里至來時所渡處始
涉而北夫三分石下水俱稱一出廣東一出廣西一下九疑為瀟水出
湖廣予知此乃知為石分三歧耳其東北合北與西諸水即五澗交會
處出大洋為瀟江源直東者自高粱原為白田江東十五里經臨江所
又東二十里至藍山縣治為歸水源東南者自高粱原東南下五里之
大橋下錦田西至江華為拖水源而三分石水初不出兩粵也且其南

有錦田水橫流為楚粵界閩錦田東有石魚嶺屬廣東連州水至此始
東南流入東粵耳乃從舊道下至牛頭江日已暮命道猺從間道趨韭
菜原以自此而南絕無一寮而此原有高山猺居也初升猶上山既東
下聞水聲出深壑中時捫危級下又一里過兩獨木橋見火光熒熒伏
畦旁乃猺人捕蛙者已而茅寮在前呼之一人秉炬出逆歸托宿焉
三十平明行始見所謂韭菜原在高山底若釜西越一山二里出清水
潭遂循故道返斜岩飯仍出宿路亭是夕始睹落照

四月初一從路亭東北歧隨蕭韶水西岸行三里西望掩口東西山峽
已出其下平疇矣於是東山漸豁路因溪東轉溪兩旁石盤錯競敵水

奔東其中隘處如門即架木其上以渡之而循溪南岸行共七里抵下
觀下觀西有溪自南流下觀而東石梁鎖其下流水出橋下東合蕭韶
水其南一溪又自應龍橋來會三水合勝舟北可二十里至寧遠過下
觀始與蕭韶水別路轉東南向南望下觀後千峰萬嶽亭若竹竿玉
立中有最高銳者名吳尖山下有岩窈窕富不減斜岩內有尤村洞外
有東角潭俱此中盛奇處恨未帶杖履其中搜剔奇閎也東南二里大
溪南自尤村洞來橋跨其上即應龍橋也亦稱通濟橋已渡橋遂南入
亂峰中乃吳尖東派二里上地寶坪坳於是四際皆奇峰曲折獅象龍
蛇之石夾路起與人爭道共六里飯山口峒名雖山口實瑤房錦幄桃

源鹿門那辨此幽奇邃詭也南出口踰嶺共三里忽兩峰夾道競險
爭高刻墓詭態極其變幻峰下小溪南向憩溪橋過儒冠者王璇峰家
尤却內欲挽予還其處為吳尖主人予期以異日過峽南始有容土負
塊山又五里踰嶺抵大吉野石峰復夾道起路東一峰下嵌空玲瓏逆
懸歎裂蜃雲不足踰其巧予望之神怦然動亟分荆入皆竇空通漏上
盤腋轉莫可窮詰西峰懸削不少雌遜路出兩峰中透隘南始豁然山
開曰路園下石峰至是始盡東西俱盤板崇巒南二里始出大道又南
五里宿界頭舖為寧遠藍山界其西大山曰滿雲山當是紫金原之背
其支東北行界遂因之

初二東南行問所謂石柱山俱莫知所在共五里過嶺至總管廟遙望
正東有聳尖卓立者不辨為樹為石又東南五里至顏家橋始辨為石
峰也橋下水東北流去過橋東南踰一小嶺大道南十五里至藍山余
東折取臨武道五里過寶林寺讀寺前護龍橋碑云寶林山脉由北柱
來乃悟向所望疑樹峰即志所稱石柱碑所指北柱也東過護龍橋
下水南流洶湧即顏家橋溪委曲至者隨溪東走北瞻石柱峰倩削如
碧玉簪兩旁石崖俱兀突露奇然較之尤溪山口峰此裁得其一體耳
又二里至下灣由大樹峙路隅上枝分聳下盤曲偃蹇大七圍旋窩錯
節間俱受水若洗頭盆亦樹妖也又東路出卧石中溪始折南向藍山

路乃東二里一橫道自西南貫東北即藍山趨柱陽道又東沿白帝山
南十里抵雷家嶺

初三大溪自藍山曲而東至循溪東行已而溪南折路捨溪東踰嶺共
五里大溪復自南來曰許家渡而東一里溪北向入峽路南入山十
五里至田心舖南徑道開闢小溪來自朱禾舖北向去自此路西大
山由藍山南向排列澄溪帶之路東石峰聳秀亦南向排列喬松蔭
其上置道于中三里一亭供倦旅憩卧二十里飯朱禾舖為藍山臨武
界一里渡永濟橋水東流抵東山麓折而北入歸水又南四里為江山
嶺則南龍大脊水遂分楚粵云嶺西十五里曰水頭志為武水出西山

下鷓鷁石當即其處過脊即東南循水行四里至東村東南一里踰嶺下行塢中路旁喬松合抱夾立三里出兩石山口又四里達墊江舖南去臨武尚十里

初四聞墊江東北十里有龍洞甚竒遂由小徑行四里出臨武北向桂陽州大道一里即渡溪越捱崗嶺復從小徑西北入山共五里抵石門蔣氏蔣氏居後洞在山半翠微間洞門東南向一入即見百柱千門懸列其中俯窺以下則洞外層也從東上穿入列柱衆柱復迴環成洞如委房深閣無不徹明達隙八窓掩映從所歷洞無此開望宏麗屈折殫工者時蔣道還取火炬予貪竒獨先至意炬入處當在下洞外層後及

炬至導者從左洞後穿隙西入連入石門數重已轉出外洞之後下層之上乃北踰石限穿隘進即下石池中水澄明不流兩崖俱穹壁列柱池水深三四尺中有石梗卧水底水浮其上僅尺許踐梗行蹇裳可涉十步之外卧梗又橫若限之外池益大水益深水底白石龍首頂橫脊尾拖池中逼崖側又前兩三步圓石大如斗擗揷水中不知水者亦尺許密依龍側真額下物也珠旁又一石大陪珠中凹如白面平水曰珠盤然與珠並列未嘗盛珠也由此而前水深五六尺無梗絕涉西望水洞宏廣若五畝池四旁石崖攢突參錯而下泥水不得去洵異境也其西北似有隙更深恨無槎可航還從舊路出經左洞下迴望窪洞外層

紛綸窈窕乃獨下洞底環洞四旁轉出列柱後洞雖不深通而芝田蓮
帷上下重布即無內二洞亦自成一奇也此洞品第固當在月岩上下
返墊江南十里抵臨武

初五出臨武南三里過迎榜橋南即掛榜山予初過不之覺從其南
東上嶺共七里過深井坪又南二里路從右下是謂鳳頭岩即宋王淮
錫稱秀岩者洞門東北向度橋以入出洞下抵石溪溪流自橋即伏流
石間復透隙滌涯破洞東入此洞即王記所云下渡溪水其入無窮處
也第王逆上洞而下此則水更由外崖入予抵水洞口深不能渡聞隨
水入洞二丈即見天光五丈即透壁出山之東是山如天生橋水達其

下僅三五丈往連州大道正度其上但高廣度者不覺耳予登巔東瞰
深壑下環峽流東注近俱峭石林立灌莽翳之不特不能下亦不能窺
王記所云其入無窮者臆說也還度迎榜橋迴瞻掛榜處石壁一幅色
黃白成章剖峰平列但少方整耳遂宿臨武生祠中

初六出東門東南四十里至鳳集鋪為臨武宜章東西界又二十里抵
梅田白沙巡司

初七司東渡武溪東北三十里為芹菜坪有石峰分竅下層崖承之邑
班赭雜黑極似武夷一體此處四山俱青萼峴坑獨此有異又五里過
隘口循塔山北垂覓小徑轉入山坳曰良岩寺向西南岩向西北岩口

有池一方僧鳳岩為煮金剛筍供粥下午至宜章城南三星橋過橋則市口夾道商旅雜還為南下廣東之大道路循城而東已乃北十里過牛舫洞在青岑山東北麓更北一里至野石鋪其北石峰嵌空層階路左即為野石岩投宿岩下村家欲從舍後上岩須自其中舍後門出予乃從南畔亂石中攀崖踰石入先登一岩其門岬然內有透頂隙不甚深仰視門左有磴埋草間亟披棘上西南行石徑中復得石門如合掌內雖隘稍深石裂旁竅上亦透天光而東壁半一圓竅透光如鏡出峽門西北隨磴上則穹崖削立上有疊石分霄下成展嶂以薄暮乃下聞中室牖內有呼客聲謂客探岩曾見仙詩否予以所歷對日未也穹崖

之東峽門之上尚有路可登明日當再窮之且為予言高雲山乃衆山頂路由黃岑巔而上宜章八景有黃岑滴翠白水流虹二勝在其下不可失也

初八復登岩上由穹崖東叢鬱之下果得路上數步亂石縱橫路復莫辨乃攀踰石筍上俱嵌空決裂有大石高聳於外夾成石坪掩映愈勝還至失道處見一石穴即在所踰石下匍匐入其內嶮岬起裂列穴旁通宛轉透石坪下皆明朗可穿前越其上茲又達其底然終不得洞中詩下岩南從舊路抵牛舫洞北西越山峽出峽共五里循青岑向麓行西三里轉一岡始與南來大道合北上曲折嶺二里直躋嶺坳西即白

水流虹章水上源也。水自高雲山南經黃岑洞，由此出峽，布流懸石下。土人即稱此嶺曰黃岑。然黃岑山尚北峙，此其南下支。踰嶺西北半里，即溯白水，上流行黃岑山危峙東北。陽環成洞，大溪橫貫之。溯溪西行三里，仍北轉溯溪一里，乃捨溪登嶺。溪在嶺南，聞溯行三十里可抵黃茅嶺。乃北上一里，西下塢中，是為藏經樓高山。四迭小澗，滌門寺甚整潔。昔為貯藏所，近被賊焚劫，移經高雲矣。由寺左登坪頭嶺，直上二里，踰嶺塢甚幽。山幃壺翠，衆壑爭流。修篁一丘叢木交映，中一靜室出焉。半里塢窮，復溯澗北上嶺。里許嶺已巔，水復不絕。此坪頭而上第二嶺也。水自上塢透峽，下路循峽入平行半里，渡澗東北上嶺。澗東自黃岑

山後來平流塢中，石坪殷紅，清泉素潤，色伴濯錦。出峽下瀉，鳴珠玉韻，重木翳之，杳不可窺。於是遶靜室西南下，注出藏經嶺南，為大章之源也。嶺不甚高，半里漸盤出黃岑北山，鷗鮮麗，光彩耀人。北坪頭第三嶺也。過一坪又東北上第四嶺。里許踰其脊嶺，西石峰突如踞獅為將軍山。踰嶺北下行深樹中，共二里得高雲寺。倚翠微，踞萬峰頂上也。以憊極，日未暮止焉。

初九東北叢木中，下三五里抵山麓垣山村。側北上虎頭嶺，東坳中澗水瀉大石崖下，懸簾曳布。亦此中僅見。踰坳溯流北行塢中，踰嶺下共四里有溪自西而東，渡溪又一溪自北來入溯溪北行峽中，二里

為大竹峒水自西來想為黃茅嶺餘波也東踰大竹嶺為大竹山南
下脊上少下多東向直下二里是為吳溪東一里渡橋北上小分嶺亦
上少下多二里下至仙人場有水頗大北自山峒透峽而東一峰當關
扼之水激石南折峰剖其西巖。轟辰以為下必有洞壑可憩絕流以
渡竟無人居東北十二里出良田又北十里至萬歲橋

初二十里至柳州。東百里餘山下有泉方圓十餘里其旁石壁峭
立泉深莫測是為鈷鉬潭永州鈷鉬潭不稱大觀柳子厚有愛斯名移
稱永郡耳

十一午後下小舟東北由蘇仙橋下順流西北去六十里達柳口則柳

江自東南來水自正東二水合流勢始大來水出桂陽縣南五里來山
下西北至興寧縣勝小舟又三十里至江東市勝大舟又五十里乃至
此江口諸峰俱石崖盤立寸土絕麗志稱曹王寨山極險峻暮不及登
舟人夜鼓棹三十里抵黃泥舖雨至而泊予從蓬底窺之外若橋門心
異因起視則一大石室下也寬踰數間屋下漚為潭四舟俱泊其內岩
外雨聲山色不意夢中睹此奇境四鼓雨止乃行昧爽達程口

十二晨炊程口肆中程口者志所稱程鄉水也地屬興寧水發源茶陵
鄱縣界舟溯流入皆興寧西境進有鐘源山土人誇為名山又進則小
舟尚可三日程踰高脚嶺則茶陵道矣程鄉水西入來江煤炭大舟鱗

次水淺不能發上午得小煤船附之行程口西北重岩若剖夾立江岸
兩涯純石盤亘錯寔色間赭黑環轉一如武夷如此四十里又二十里
過永興縣十五里為觀音岩在江北岸西南下瞰江中石崖騰空上
覆下裂如剖半瓜其足疊閣兩層閣前有洞臨流中容數人由閣西懸
梯直上上接崖頂透隙上一龕嵌覆頂下中祠大士石下一石獅橫卧
江心下舟又五里至森口大溪自南來乃桂陽州龍渡以東諸水東北
合白豹水至此入來江又北五里泊柳州灘永興以北山始無迴崖寔
石觀

十三六十五里過上堡市地為來陽境北過坵登直釣岩前有真武
殿觀音閣東向迎江洞門瞰江南向當門石柱中垂界為二若連環然
其內空濶平整石隅裂一竅歷磴上別為邃室左隅由大洞深入石竅
忽盤空起東迸一竅歛納天光內又盤空起透頂直上天光一圓下墮
其中直是井底觀天也下午九十里抵來陽縣江經城東直北去山至
此盡開

十四順流北百二十里至新城市為來陽衡陽分界乘自垂流六十里
泊相公灘

十五百二十里至前溪渡陸路抵府止三十里水倍之渡西岸遂登陸
西行十二里已暮

十六二十里渡湘江已在衡郡南關外抵金寓靜聞宿花藥未歸及歸
桂藩助金事尚未就

十七已定廣右舟

十八舟人以同伴未至改期二十日早發

十九靜聞同祥甫賈王所助游資來

二十冒雨下舟靜聞往謝桂藩追至南關外揮手別祥甫舟即解維三
十里泊東陽渡江漲濁湘流又作一觀

二十一五十里將抵松栢忽衡友劉明宇使_之追予晤別乃與靜聞登
涯_逆之而劉不至宿山頂茅菴

二十二聞劉已舟往松栢匍匐雨中二十里別劉松栢肆中時所附廣
右舟計竟日力當止於常寧河口乃遍覓漁州為夜抵白坊計二鼓雨
止月出已抵白坊驛已念再夜行三十里可及舟適見二舟泊下流予
漫呼顧行得應鼓始知舟猶待予於此也乃過舟

二十三北行二十里過大魚塘見兩舟被劫哭甚哀於是同行兩舫人
謝予曰昨不候君暮亦當至此始舟子以候予故大為衆諾至是甚見
德色共六十里泊河洲驛

二十四歸陽驛

二十五小河口

二十六觀音灘

二十七初陽縣予乃同靜聞出初陽東北一里憇甘泉寺泉一方當寺前坡下味及淡冽似惠泉殿前有吾郡宋鄒浩甘泉銘碑張南軒從郡中將氏得之跋而鐫此鄒大書張小楷可稱二絕寺前山第二層之東盤成一窩則九蓮菴也邑人陳尚書重建藏經閣中供高皇帝像唐包中舟窄衣眉如卧蚕中不断踈鬚傑張陳氏得之內府供此者九蓮菴山南盡前有大池乃甘泉南下東流注於湘入湘處為瀟湘橋北一峰突起竒石靈幻湘江欲南至此東折去祈江從北至此南向入湘乃三水交會中也峰頂曰瀟湘廟之後裂瓣簇石能多竒

二十八水漲舟泊竟不成行

二十九昧爽放舟曉色蒸霞層風開藻既而火輪湧出金光騰耀中直從舟尾射于枕隙泰岳日觀不謂得之卧遊也過二十四磯泊黃陽鋪閏四月初一冷水灣

初二湘口閏自冷水灣來山開天曠自界大騁江南岸瞰水之石出沒屢變但有所遇靡不靈心綴目蓋入初陽境石質竒石色潤過初陽窅兀之勢以次漸露至此隨地湧立及入湘口則從窅窅盤亘者變為峭壁迴翔矣

初三放舟入湘口於是別瀟專向湘瀟即予前入永州道與湘交會此

二水一東南一西南界其中者為芝山北盡兩流夾之尖若龍尾下垂
因其脊無石中砥故挫之必銳而後已由湘口上多西北之曲灘聲愈
多石崖愈奇凡四十里有駢立東岸者與江左平剖之崖夾江對峙如
五老比肩愈見奇峭西轉五里過軍家埠又南轉一山中剖平插江右
其下雲根倒浸重波時落日正啣山外舟過江東忽峰間片穴通明若
鈎月與日並懸旋即隱蔽乃去軍家埠五里泊

初四東過掛榜岩平削江北下嵌水面其上石若磨崖色間黃白遠
逾臨武南行三十里抵石溪驛已屬東安境有東江自南北注湘石梁
跨其口水發源零陵南舟由橋下南溯十五里為零陵境又二十五里

為東江橋上有小河三支通筏而已按志永水出永山在
十里北入湘即此水無疑也石溪之西有山突兀石崖下挿
北向如重門懸峽山之後頂為獅子洞門東南向不甚高敞穿石
下一里可透出臨江門峽惜時方水溢臨江處既沒浸中洞復無炬入
遂返又五里泊白沙洲其對岸石壁臨江黃白燦然充壁崖北山巔又
起一崖西北向有菴倚之隔江不能往也

初五十五里上磨盤灘兩岸山始峻峭崖突北岸者飛瀑掛其腰間雖
以南北觀要為不斷之流又五里為兵書峽西坳亦有瀑如練又五里
為沉香崖斜凌成紋高迴處疊紋忽裂中吐兩枝望之木形黝色上

有大樹一株正當崖頂更有上崖一重內峙卷嵌其間層巖從聳翠下
挈遙江真異境也過岷泊羅埠

初六江漲舟纒掛帆行五里

初七西六里兩山門立遂分楚粵界又南三十里上金華灘東石崖當

衝轟流蕪壁高下兩絕險勝一時又西十里止廟頭

初八放舟南行二十里為黃沙鋪粵舟可直抵桂林予欲盡全州諸人

遂止此從陸為粵游始

望平縣法湘石梁

山五丈又二十五里